

2 Korid# Korid# Mwaalyaraav+na Poli Pikarya Pigasaalya' Yidavakesi.

¹ Korid# Mwaalyaihi, nya'mweihi

Polinyi Gotiyare simunyavi Kiraazitiyai
Jizaazai gaminyineba nyidaasadeinyi
nyidahlakakeinyi pikarya da'
yihithawasawaabe. Nimi neya'mwei
Timotilyi sainaai Gotiyare kusilaanyaviyaihi
anga Korid# mwaaihasaihiyi Piroviji Giriza
yuneba Gotiyare tewaanyara mwaaihasaraji
saihihina yihithiwoi. ² Gotiyai Neni maangelyi
Naanga Jizaazai Kiraazitiya kwalyi yanga
gaimwange'na tewaanna yihika! Yakilyiyagaa'
kwaamu'nanyaburi tewaanna yihimwaaihika!

Gotiyai kugaimwaga' Poli suya widake'nesi.

³ Gotiyari yilaaya nayaa maryaana! Sai
Gotiyai nemire Naanga Jizaazai Kiraazitiyari
Ganimaangelyi. Yi sai Nimiwai kale'na
gaimwanga naange'na aaya kaavilyalyi. Yi sai
Gotiyai a'mwe yuyaraavire simunyavi taanginya
yuyanna yivaimwadelyi. ⁴ Sahwai yuya
taanginya neyima'nadengina nemire simunyavi
nayaa neyivaimwadelyi. Sarevidaa'nyi Gotiyai
nemire simunyavi neyivaimwadevaabisavi
yi nemi sareina a'mweraavire simunyavi
taanginya gazasa' kininnakeraavi yiniga
wi'na yivaimwagaanneine. ⁵ Neyivaimwade
sa' dare'nanyi. Daanga naange' Kiraazitiyai

maarakesi. Nabaai nemi kwainaji ma'daanyasi. Yi daange' yune naanga ney+ma'nadevaai+ y+ nabaai Kiraazitiyari+ nemire simunyavi y+vaimwangebwi yune naanga ney+ma'nade'nanyi. ⁶ Nabaai nemi taanginya' maraaja daza' Gotiyai sariminyine simunyavi y+hivaimwagya'nesi sahwai y+hivadaihasamaarya'nesi sara y+ma'nade'nanyi. Yi nabaai Gotiyai nemire simunyavi ney+vaimwagaza' y+ sa' sarimire simunya kir+viji y+vaimwagathesi. Nabaai Gotiyai sarimire simunyangi kave kihyoji y+ nemi daanga ma'daanyabaaibi' sarimi sasare maapija' diraginna daavapiji nayaa jide'nanyi. ⁷ Nemi dara yawi'manigo. Sarimi daange' nemi y+ ye'mwannamaa'manigatabaaibi' nabaai sarimire simunyavi nemi nyiji y+vaimwangebwi d+neye'mwannamaaryideihilyi. Yi sare'na nemi diraginna dara yemwaidaanyi. Yi sarimi diraginna d+thaayideihilyi.

⁸ Sare' darevinyi. Nya'mweihi, nemire simunyavi dara yawi'manigo. Nemi nyi Piroviji Eziya dazavi ney+ma'nake' taanginya dazavina sarimi jaw+ranganyila! Taanginya naanga sa' namarulawakakesi. Yada yi nemire diraginyavi nebulya'na wav+lava'. Sarev+daa'ny+ y+ nemi dara yawiro. Nemi gaalyaina mwalaadeina daaka! Nemi balaadeinera. ⁹ Naanga nebulya'nanyasi. Nemi saina taanginya' y+ bwak+manigo. Yaw+ bwa'dei mena dakabaaibi' nemi balaade'na. Yi Gotiyai "Kumi kunnya diraginya sabwina nyaw+ral+mwagap+dika! Aawa. Nimi a'mwe bain+keraavi ayahi

yidîkaa'dînyainyî nayaa yawîralîmwagapîka!" kada' sasare sa' yîma'nakesî. ¹⁰ Kayaa'nanaanga daza nemînyî kayaa'na neramakadaasî Gotiyai sahwai nemînyî ayîna nevadaihasamaarakelyî. Yî nabaai dahaa' sahwai kuna nevadaihasamaa'manîkelyî. Yî nemî sahwari'na diragî'na limwadaa nayaa dara yemwaaimanîgoînera "Yî nabaai dîvi kîgaasî sahwai ayîna nevadaihasamaarakelyî."

¹¹ Yî sarîmî Gotiyarî wîja'na nemînyî nayaa ye'mwannanegaimwadaapîjî sara nevadaihasamaarakelyî. Sarevîdaa'nyî Gotiyai a'mwe kwalaalyaraavîre yîdaanganya' kadîka wî'nada yî sahwai yanga tewaanna neyaja'na yî yuya kwalaalya dazara wî'napîjî yî nemînyîna Gotiyarî "Su! Su!" wîdîpî'derera kwala naangera. Yî "Sare' yîma'nana!" dona yîhîthîwo.

Polî Koridî mwaalyaraavî kwaasî mujake'nesî.

¹² Sare' darevînyî. Nemî nemînyîne yaya' munyaba makinya' yaasîwa'na mî'. Aawa. Sare' daresî. Nemîre sîmunyai padaihirakyai dara jalîkurakadelyî. Kwaaka davakî mwaalyaraayawî nemî kaanya yamaryadaanyanna nawî'nya yagoînera. Yî nabaai sarîmînyî nawî'nya naanga yagoînera. Yî daresî. Gotiyai nemînyî tewaanaanga sabwinajî yîda'nanya nebulya'nanyabwinajî nejaavadevurî sara yagovulyî. A'mwe kîlaakejîkîyabulyîyaraavîre sîdusabwî nemarîma'naabadevwi mî'. Aawa. Gotiyare yune yanga gaimwange'na negaimwadaasî

nemi kaanya sasara yamaryoinera. ¹³ Sare! darevinyi. Nemi sariminyina yagaala ge' yida'daanyaina mi'. Aawa. Yagaalya' sarimi yiniga wi'na dangadivisagaa' yagaala savire aaya kaavilyavi jawiranganyideihilyi sa' sahiri'na. Yunegaa' sarimi neminyina nebulya'na jawiryideihilyireva diraginna limwadi yemwaaihe. ¹⁴ Sinnawi' sagaa' neminyina maali'na yawiretabaabi' yi yunegaa' nebulya'na jawiryideihilyi. Yi daresti. Nemire Naanga Jizaazare Yirikeriki sarimire nayaa dimwaalyide'na nemi sariminyine yaya' munyaba makilaadevaabi' yi sarimi nemi Gotiyare yagaalya' makaboinaavine yaya' munyaba dimakilyideihilyi.

¹⁵ Yi simunya dzasarevi diraginna dara yawirakiwa'de. Sinnawi' sariminyawidaasi wideinyira. "Yi pigasaai yanga gaimwange! maapika!" da'muji sariminyawinna ayina wideinyira. ¹⁶ Yi saba nimi mwaala'muji yihyahalya'mava'muji Maazathoniyana kaanya yamarya'na wideinyi. Yi Maazathoniya yagalya'mava'muji pigasaai sariminyawinna ayahi bideinyi. Yi nimi sariminyina yawi'manige. Niminyi kamaranyaasapiji nimi Juthiyana wide'nanyi. Sara yawirakiwa'de. ¹⁷ Gatha'darevaka! Sara yawirakiwa'de kiri' sariminyawinna mabiwa'de. Sarevidaa'nyi nimi yagaalya' gazare diwa'deinyi daaka! Aawa. "Sara yideinyi," nebwina dadinyainyi. A'mweraavire kilakejikiyabwina yawirakadinya "Nimi yagaala dadi 'Yo! Yo!' kiri' 'Aawa! Aawa!' simunyavi yawiri'ma!"

dadĩ yawĩrakadĩnyainyĩ daa! Aawa. “Sara yĩdeinyĩ,” dena yĩwa'deinyĩ. ¹⁸ Gotiyai nebulyabwi lĩmwaga'devĩ nemi kwainaji nebulya'na wĩdadaanyainera. Yĩ yagaala sa' sarĩminyĩne' yĩhĩthadaanya' maangevĩ “Yo!” wa'dori kirĩ' simunyavĩ “Aawa!” yawĩ'manĩgo' mĩ'. ¹⁹ Sare' darevĩnyĩ. Gotiyai nebulya'na yadere Gawaalĩvaangei Kĩraazĩtiyai Jizaazarĩna sarĩminyaba nemi yĩhĩzĩwaakolyĩ. Yĩ nĩmĩjĩ Saailaazalyĩ Timotilyĩ saina yĩhĩzĩwaakoi sahwai pĩgaa' “Yayo!” pĩgaa' “Aawano!” kĩnĩnnakei mĩ'. Aawa. Yuyagaa' sahwai gamĩre yune naanga nebulya'na daka yuya sangĩna “Yayo!” kĩnĩnnakelyĩ. Yuyagaa' nebulyabwi kĩnĩnnakelyĩ. ²⁰ Sare' darevĩnyĩ. Gotiyai yune naanga nebulya'na wĩjaake gazasa' yĩ Kĩraazĩtiyai “Yayo!” daka yunebanna sara yakelyĩ. Sahwarĩ kumĩre “Yayo!” wĩwarĩ'. Sarevĩdaa'nyĩ Kĩraazĩtiyarĩ Gotiyai yune naanga nebulya'na wĩjaake yunebanna yĩma'nake'na Gotiyarĩne yaya' makĩlya'neina Gotiyarĩ wĩdadaanyĩ. Nebulyasĩ. Sara yĩma'nana! ²¹ Yĩ Kĩraazĩtiyarĩ wĩlamwaaihovĩ nemĩnyĩ yĩ sarĩmĩ kwaihĩrijĩ dĩragĩnya neyĩvaimwadei yĩ yune gamĩ sai Gotiyalyĩ. Yĩ sai nemĩnyĩ dahĩlakya'nei gannya Kuryarĩ nemĩre mĩnyagĩnyangĩ dĩngakelyĩ. ²² Sahwai nemĩnyĩna yawĩ'na “Sahwara dĩragĩnna dara yawĩpĩka! ‘Nebulyasĩ. Nemi Gotiyareinera. Nemĩnyĩ dĩragĩnna nemaredaa'deiner.’ ” Sara yawĩ'na yaka gamĩre yawĩkwajĩke' nejaavada nemi sara yĩma'nya'neinaavĩna

gannya Kuryari yanga nejaavakelyi. Nabaai nemire simunyangi sinnawinya'bisai Kurya Tewaanyari nejaavakelyi. Gotiyai gannya yuya nejaaya'nenna Kurya Tewaanyai pimagi'nya naangeva' mena nejaavakelyi. Yi nemi dara yawi'daanyi. Naanga nebulya'nanyasi. Gotiyai gannya Kurya Tewaanyari nejaavake'na divi yuya nejaavadelyi.

²³ Nabaai nimi sainyi Gotiyai sasarei nimini'ne jalikurakya'neri jaka widiwa. Yi nimi kwaasi diwija' nimore gaalyabwi yiwawadesi. Kiri' aawa. Nimi naanga nebulya'na divanige. Nimi sariminyi yavada'gaidi taanginya ayina wijaaya'na "Aala!" diwa'de. Sarev'daasi "Sariminyawi Koridina bideinyi," diwa'de kiri' nimi yari wiwa'deinyi mi'. ²⁴ Sare kirivi nemi sarimire limwangeburi diraginna mamareyihimwaalyigo. Aawa. Sarimire yilaayabwi marima'naabya'na nemi yihye'mwannayihivaimwadaanyaine. Sare' darevinyi. Kiraazitiyari diraginna limwangeburi sarimi diraginna mena daa'manigasaihilyi.

2

¹ Yi ninnya yune simunyavinyanya' mena wi'na dara diwa. Nimi sariminyawinna sariminyi munyi' taanga yivalakya'na ayahi mwiyi yideinyi. Dena mwiyiwa'de. ² Sare' darevinyi. Nimi sariminyi munyi' taanginya yihizaaviwija' yi nimore simunya' yilaaya ya'na yiniga wi'na aaihwai yannelaka! Aawa. Sarimire munyi' taanga mena yihivalakiwija' yi

nimire simunya' yilaaya nyivalya'nera a'mwera pwara m'i'. ³ Sarimi a'mweihi niminyi yilaaya nyigaibineihilyi. Sarevi sariminyawinna sarimire kayaa'nanya' wanganaaw+wiji kwaji sariminyina nimire munyi' taanga kamaa'mudika! "Mi'na kyavada'galapiri wideinyi," dena sariminyawinna wawa'deinyi m'i'. Sahir+savine'na kigaa' paaziya' nimi yihithave. Yi nimit sarimi yuyahirina diraginna dara limwamwa'de. Nimi pininna yilaaya yiwija' yi sarimi yuyaihi yilaaya avaina yadivisaihilyi. ⁴ Sare' darevinyi. Sagaa' sarimire mwaalyabwina nimire munyi' taanginya naangesi nimire simunya' daanga naangesi kininnakeinyi nabaai kidalaalya kwalaalyangi pikarya yihithave. Paaziya daza' "Sariminyi munyi' yune taanga wivalakima!" majena yihithave'na m'i'. Aawa. "Sarimi 'O Polimi neminyina tewaanya naanga wivu'nivanikelyi,' yawirangabika!" dena yihithayesi.

Pwai gannya yiwetawakya' wia-galya'mavakeri ayina maaresa'nesi.

⁵ A'mwe akwai gamirebwina kya' kale neyadaa'nyi sai yune nimit gaveinyi kale sa' manyivani'. Aawa. Sahwarina kale kibawenna yuyahirini yihivani'. Nimit "Savina taanginya naanga nujaavwidika!" yagaala dena "Kibawenna," yihithiwe'nanyi. ⁶ A'mwe dazareri a'mwe kwalaalyaihi mi'na yeve' yi sa' sari wi'nanne' tiviki'mwa'daasasi. ⁷ Sarevidaasi yi dahaa' sarimi mudika piriri' pibwi jila! Yi sahwai gannya kayaa'nanyaburina kale

nayaa wiadaa'nyɪ gamire kayaa'nanya sa' yange'na marasi'napɪjɪ sahware simunyavɪ kave nayaa jivaimwagila! Munyɪ' taanga naanga naange' nebulya'na nagalavilawakadɪka a'mwe dazari! ⁸ Sarevɪdaasi yɪ nɪmɪ yaamɪjɪ diraginna dara divanige. Sahwari sarimire kale ya sabwi ayina jivwarɪdaakwila! ⁹ Sare' dare'nanyɪ. “Sarimɪ nɪmire yagaalya' yuna mɪdɪbzaihi daaka?” dena sariminyɪ yaamɪjɪ yɪjɪwaalya'ne! “Yawɪranganɪde'nanyɪ,” dena sinnawɪ pikarya pirɪ' a'mwe sarɪnaji nɪmɪ yɪdavesɪ. ¹⁰ Yɪ nabaai sarimɪ a'mwe sarɪ wagɪlya' marasi'nɪwa'daasa' yɪ nɪmɪ kwainyɪ marasi'nɪweinyɪ. Sare' darevinyɪ. Nɪmɪ wagɪlya marasi'nya'ne kinɪnnakeinyɪ daakajɪ yɪ sa Kɪraazɪtiyare tinnyari gaimwanga yihya'neinyɪ nɪmɪ marasi'nɪwengi. ¹¹ Nemɪ nayaa sara yaana! “Saataanɪ neminyɪ kwaasi neyojɪ nanevilawakadɪka!” dawaajɪ sara yaana! Sare' darevinyɪ. Sahware simunya kayaa'nanyabwi mena yawɪ'daanyaine. Sare'na taanga naanga sarine nayaa marasi'naana!

Gotiyare nelɪmwagarɪka mudɪkevɪne wɪdaayadɪvɪsaraavɪnesɪ.

¹² Pigaasagaa' anga Tirawaazɪna Kɪraazɪtiyare yagaala tewaanya' wɪjɪwaakya'neinyɪ bi'mavena yɪ Naangei nɪmɪnyɪ tusa' yiniga wi'na wɪjɪwaakya'na kanyɪbaasiwa'dɪ' wɪjɪwaakiwa'de. ¹³ Kirɪ' nɪmire simunya' kave mwariwa'dɪ'. Nɪmɪnyɪ nya'mwei Taaitazai anga sabanna sariminyɪne yagaala mamakabyakerɪ tinna mwanganyɪwa'de.

Aawa. Simunya kwalaalya yawi'di Tirawaazi mwaalyaraavi nayaa yagalya'ma'na yena Pirovij Maazathoniyana bena bi'ma'mwa'de.

¹⁴ Kiri' saba Taaitazari sariminyine kadika wi'n'wa'de'na Gotiyari nimi suya widivanige. Kiraazitiyai yuya kayaa'nanyangiji yuya kayaa'nanyaraaviji malyavi mena dathiwagakevidaa'nyi yuyagaa' Gotiyai Kiraazitiyariji yaaraya neyadaa'nyi yilaaya yiwadaanyaine. Yi sahwai gamire yagaalya' nej'waakada yi yuya pimagi wijiwakamaryadaawoji a'mweraavina Kiraazitiyari wibwaridaakwadelyi. Yawita daza' sa' wabatirinya' yuneba winigode'bisasi. ¹⁵ Sare' dare'nanyi. Kiraazitiyari'na wijiwakamaryadaanya' wabatirinya' Kiraazitiyari yima'naabada yi Gotiyaryawinna wawode'bisaine. Nemi wijiwakamaryadaanyagaa' Kiraazitiyai wivadaihasamaa'manikeraaviji pwara kayaaka yigainivanigasaraaviji saraayawinna tirinya' wawodesi. ¹⁶ Yi piri' daresi. Sahwara kayaaka yigainivanigasaraavi yi sa' barya'ne tirinyasi. Yi sa' baryabwi sahwaraavi marima'naabathesi. Yi piri' daresi. Pwara wivadaihasamaa'manikeraavi sa' gaalyabwine tirinyasi. Yi sa' sahwaraavi gaalyabwi marima'naabathesi. We! Wawinya daza' gannya diraginyavi yiniga wi'na aihwai yannelaka! ¹⁷ Sare kiri' darevinyi. A'mwe kwalaalyara nigwia maa'nya'nera Gotiyare yagaalya' yaasiwa' wijiwaakadiv'itabaaitaina mi'. Aawa. Nemi Gotiyare wawinya daza'

ma'daa yi nemi yaasiwa' kwaasi yagaala damaryadaanyaina mi'. Aawa. Nemi gamire yagaala yuya yida'na mji#wodaanyangi. Nemi Kiraazitiyari wlamwaaihoina yi Gotiyare tinnyari Gotiyar#ne jalikurakadaa wji#waa#vanigo.

3

¹ Nemi ayahi yamaasa' yadaa yune nemi#ne yaya'na munyaba dahamakimanigo! A'mwe pwara paaziya' kumi#ne yaya' makilya'ne' limwamanigatabaai# a'mwera paaziya sabisa' nemi#yine' y#hidavesa' negainin#keina d#ngaka! Sarim# sasare pikarya nemi#yine' nayaa jithavide' negainin#keina d#ngaka! ² Paaziya nemi#ne yayavi munyaba makilya'ne sa' yi sarim# sawhai#lyira. Yi paaziya dazavire pikarya sa' yi nemi#re simunyavi w#lari'. Yi dara yaw#d#nyainyi. Sarim# y#vanigasabwi paaziya'#bisabwina dara d#ni' "Pol# Gotiyare wawinya' nayaa yadelyira." A'mwe yuyara paaziya daza' yaw#rangadivi' yi sawhara dangadiv#sai#lyi. ³ Sarim#nyawi nemi nayaa y#hithaayo saihi Kiraazitiyai pikarya y#davakeihi ku'maayaba marima'naabahesasi. Yi paaziya daza' sawhai y#giyasi y#davaka' mi'. Aawa. Gotiyai gaalya' kin#nnakere Kuryalyi sawhai pikarya y#davakesi. Sawhai sipadasikaari Gotiyai y#dayaakabaai# pwaipwairiramaaraka y#davaka' mi'. Aawa. Gannya y#kwia' k#laakej#kiya simunyangi y#davakesi. Yi sarim#re simunyangi y#davakesi.

4 Aaya kaavila dazavire yagaalya' yi darsi. Kiraazitiyai negaimwagya'nei gannya diraginya' nejaavan'. Sare'na lika mi yadaa Gotiyari nebulya'na limwadaa sara nayaa yoinera. Nemire simunya diraginya' sasarevidaa'nyinyi. 5 Nebulyasi. Yune nemi sainana yiniga wi'na yaanneina mi'. Sarevi yi "Yune nemi sainaavidaa'nyini nawinya pini marima'naabadeinera!" madaanna! Aawa. Gotiyai gave pwainanyai sahwai neminyine yiniga wi'na yaanne' wakadelyi. 6 Yi nemi Gotiyare yagaala nelimwagarika mudikevi widayadaanyaina yiniga wi'na yaanneinaavi nayaa neyimavimwaaihadelyi sahwai. Yagaala nelimwagarika daza' Kiwinyavine pikarya yida'nika sa'bita' mi'. Aawa. Sa' yune Kurya Tewaanya sarengi. Sare' darevinyi. Kiwinyavire pikarya a'mweraavi dara wibwaridaakwadesi. Galazekivaimwaana! Divaideiginyi. Kir'i Kurya Tewaanyai yagaala tewaanyavina a'mweraavina gaalyabwi wijaavadelyi.

Gotiyare yagaala nelimwagarika mudikevire byaanna diraginyavines.

7 Yi Kiwinya dazavine' Gotiyai siliyari yidayaake' yi dazavire wawinya' baryabwi marima'naabakebulyi. Nabaai wawinya daza' Gotiyare byaanna diraginya kirisi yima'nakesi. Sarevidaa'nyini Ne Mozizare sinnyi' byaanna diraginya' wannakiki. Yizireliyara byaanna diraginya dazavina sahware sinnyiki yiniga wi'na baihanareta' mi'. Byaanna diraginya daza' maalika wannyina yaka divi yiwawaka,

kiriri' yiniga wi'na baihanareta' mi'. ⁸ Yi kigaa' wawinya sare' byaanna diraginya' kininnakesi. Yi Gotiyai Kurya Tewaanyari' a'mweraavina wijaaya'ne wawinya' yi sa' dazavi wavila'da Gotiyare byaanna diraginya' naanga naanga maa'de' daaka! ⁹ Sare' darevinyi. Kiwinya dazavire wawinya' diraginna neji'da'daa'nyi' nemi dina "Kayaa'nanyabwina nemi baryabwi maranneinera." Yi sare' kiriri' Gotiyare byaanna diraginya' kininnakesi. Sarev'idaa'nyi' yagaala mudika dazavire wawinya' dade' "Kurya Tewaanyarina sahwaraya yida'maraangerera," yi daza' Gotiyare byaanna diraginya' naange' kininnake' wawinya' piri'vi' naanna wavila'desi. ¹⁰ Sare' darevinyi. Yi Kiwinyavire wawinya' byaanna diraginya' maryaakesi. Yi sare' dahaa' kunesira. Wawinya' mudika daza' yi savi yune diraginna wavila'da nemi yawi'daanyi. Yagaala mudikevire byaanna diraginya' yune naange' warikev'idaa'nyi' Kiwinyavire' mwarika! ¹¹ Sare' darevinyi. Kiwinyavi' wawinya' daza' Gotiyare byaanna diraginyasi' yima'nake' mena yiwia'nesi. Kiriri' Kuryarine wawinya' daza' Gotiyare byaanna diraginya' kininnake' yuyagaa' waragwothesi. Sare'na sahiriri' ayavi' yune naanga naanga wavila'desi.

¹² Sarev'idaa'nyi' yagaala sare' kininnakeina "Byaanna sa' waragode'nana," diraginna limwadaa nemi lika mi yadaa ku'maayaba yagaala sa' nayaa yida'na jalikurakadaanyaine. ¹³ Nemi Mozizaibi' yadaanyaina mi'. Sahwai gannya sinnyiki kwaabihannyabaalyi kawaaka yirakinakelyi. Yi byaanna diraginya' daza'

maali'na yiwina yaka yinahu naanga yuya' yiwina yaake'na “Yizireliyara sa' tinna nanyangabithika!” daka kawaaka yirakinakelyi. ¹⁴ Yi Mozizare wawinya' sahwarana nayaa myawiri. Aawa. Kumire simunya nebulya'na bipale'na yakengi. Sare' darevinyi. Yuyagaa' sahwarana Gotiyare yagaala wilmwagaraka ayavire yagaalya' dangadivi' yi yagaala savi kwaabihannya daza' kuna wari'. Yi dahaakigaasi kuna mu'nyadiviki. Sahwarana kwaabihannya sa' mamarasi'nyasi. Yi Kirazitiyai gave pwainanyari' sahwarana Gotiyai daza' marasi'delyi. ¹⁵ Aawa. Gazagaasagaa' sahwarana Mozizare yagaalya' dangadivi' kwaabihannyabaai kumire simunyangi bwakalmwagari'. Sahwarana myawiryadiviki. Yi dahaakigaasi kunanyi. ¹⁶ Kir'i' gazagaasagaa' pwai kwai Naangeryawinna kaginyiwagozi yi sahwarana simunyavi' kwaabihannya daza' marasi'nadelyi. ¹⁷ Yi Naangei sai Kuryalyira. Nabaai Naangere Kuryai a'mwe pwarana mwaali'. Yi aawa, yuya pinana yagaala wilmwagaraka ayavi' a'mwe sahwarana wila yirakivanikai mi'. Aawa. Sai sah'banna teawaanna mwaali'. ¹⁸ Yi nemi yuyaina nemire sinnyikaavi' lika yulyakya'ne maayaina mwaaihoinera. A'mwera sinmwavananya yennadivitabaai' nemi Naangere byaanna diraginya' wangadaa Naangere a'mabaalyaina yima'nivanigo. Yi Naanga sahwarana, Kuryai gannya byaanna diraginya' daza' nayaa marimanaabya neyadaa'nyi yuyagaa' nemi byaanna diraginya'

naanga naanga ma'daanyaine. Yi Naangere a'mabaalyaina kuna yi'ma'nadaanyaine.

4

1 Sarevi Gotiyai kale'na negaimwagakabaaibi' wawinya nawi'nya daza' widayadaanyainaavina nejaavakesi. Savi yi nemi wawinya daza'na diraginna dadaa maa'na neyideina mi'. 2 Aawa. Nemi wagila kininnakebwi lika yulyarikeburi bule'nanya' mena wjavadaanyaine. Nemi kwaasiya saburi yamaryadaanyaina mi'. Sara myadaa yi nemi Gotiyare yagaalya' maravila'nya yadaanyaina mi'. Aawa. Nemi Gotiyari tinnyari yagaala nebulya'nanya' ku'maayabanna marima'naabya yadaanya' yi a'mweraavire simunya gazarizari dara yibwakidivisasi. Yi apozeliyara sareraavine yaya' munyaba makilaana! 3 Kiri' nemi yagaala tewaanya daza' wijiwakadaanya savi kawaaka yirakinaja' yi sa' a'mwe saba sana yiwina ya'neraavina kawaaka yirakivanikesi. 4 Yi dathahaasaraavire gotiyai Saataani a'mwe sahwara Kiraazitiyar' malimwagyadivita dazaraavire simunyangi gidiravalmwagata yadelyi. Yi yagaala tewaanyavine' Kiraazitiyare byaanna diraginyavire baake' kumire simunyangi yinga wi'na wannade' mi'. Yi sarevi tihralimwagata yadelyi. Yi sahwara Kiraazitiyar' tinna mwanganyadivisalyi. Yi sai Gotiyare a'mabaala nebulya'nanyalyi. 5 Sare' darevinyi. Nemi yagaalya' yune neminyine' wijiwakadaanyaina mi'. Aawa. Nemi yagaalya' dara jalikurakadaanyaine. Kiraazitiyai

Jizaazai sai Naangelyi. Yi Jizaazarina nemi sarimire yihithayadaanyainera. ⁶ Sare! dare'nanyi. Sinnawi Gotiyai mena jaakelyi “Jihinyavidaasi baake! mwadana!” Yi Gotiyai sarei gamire baake! neminyine simunyangi banemwadakesi. Gotiyare byaanna diraginya! Kiraazitiyare sinnyiki warike! nemi yawiranganya'neinaavina baaka sa! banemwadakesi.

⁷ Nabaai kiri! nawinya daza! kininnakeina, kwadika yaasiwa'nanyaraavi Gotiyai nawinya daza! maradingikakabaabisaine. Gotiyai “A'mwe yuyara diraginya nawinyaange! yawirangabika!” kada! dara yima'nakesi. Diraginya naanga daza! yune nawinya! yi sa! Gotiyare diraginyasi. Sa! yi nemire! mi!. ⁸ Yi nemire wawinya! yadaa yuyanna neminyi taange! neyima'nadeine. Sare kiri! sa! kayaaka nebulya'na neyigalakadeina mi!. Yawita kwalaalya nemire simunyangi nerihiralimwaga'dengi. Sare kiri! nemire simunya yunebanna yiwuya yada mi!. ⁹ A'mwera “Sahwaraavi kayaaka yigalaana!” dadivi! nega'mijamakwodivisaine. Sara neyadaapiri kiri! Gotiyai neminyi neyagalya'ma'dei mi!. Sahwara neminyi mala neradaapiri wala'daanyaine. Sare kiri! Gotiyai negaimwadaa'nyi nemi kayaaka nebulya'na yidaanyaina mi!. ¹⁰ Yuyagaa! nennya kilaakejikaavi Jizaazare baryabwi ma'daanyaine. Yadaa kaanya yamaryadaanyaine. Gotiyai neminyina “Jizaazare gaala sabwi kibulyi kumire kilaakejikaavi ku'maayabanna yima'naabana!” kada! sareina

kaanya yamaryadaanyaine. ¹¹ Sare' darevinyi. Yuyagaa' gaala mwaidaanyainaavi Jizaazarina a'mwera a'mwatamakya saza baryaburi nemarimwangadivisaine. Gotiyai neminyina "Jizaazare gaala kibwi yi kumire kilaakeji' balya'nejiki' ku'maayaba marima'naabana!" kada' nemarimwangadivisaine. ¹² Sarevi barya sabwi neminyi neyadesi. Kiri' Gotiyai gaalyabwina sariminyi yihyadevulyi.

¹³ Neminyina Kuryai diraginna limwangebwi nejaavakeine. Yi sasare dazabwi Gotiyare bukuya' yida'nikabaaibisari avaina wijayaakesi. Yi dara dini' "Nimi Gotiyari diraginna mena limwagevi yi yagaalya' wideinyi." Limwanga avalyabwi maaroina kwainaji diraginna limwadaanyavi yagaalya' widadaanyaine. ¹⁴ Yi nemini mena diraginna yawi'manigo. Gotiyai Naanga Jizaazari yidikaavakei yi sahwai nemini Jizaazalyiya kwainaavi neyidikaavadelyi. Yi neminyiji sariminyiji sainaavi nemakwawoji gaminyaba gidihusaba nemwaahadelyi. ¹⁵ Sare' darevinyi. Yuya daza sariminyi gaimwagya'ne neyima'nivanikengi. Gotiyai "Nimire yanga gaimwangebwi a'mwe kwalaalya naanga naangeraavi yunebanna wiiwarana!" kada' sara neyima'nivanikengi. Yi yuya sahwara Gotiyari suya naanga naange yipi'de'nanyi. Sara yadivi' gaminyine yaya' munyabanna makibi'dere.

¹⁶ Dazahirivi yi nemini Gotiyare yagaalya' diraginna dadaa maa'na neyideina mi'. Aawa. Nemire kilaakeji' kayaaka kuna yade kiri' yuya yirika sariki yuyagaa' nemire kuryai

mudikei diraginyai yima'nadelyi. ¹⁷ Yi daresti. Gotiyarina nemi dara yawi'daanyi. Taanga neminyi neyima'nade daza' wana maalikesi. Yi sa' wana kibawe maalikegaa' waradesi. Nabaai taanga wana maalika sa' divi sagaa' neminyine wana nawi'nya' byaanna diraginya naange' kininnake' marima'naabathesi. Nabaai wana nawi'nya' taanginya maalitaaya savi yuna wavila'de' yi yuyagaa' yuyagaa'nesi. ¹⁸ Yi nemi Kwaaka davakiyangi taanginyangiji tinnyalyi wangadaanyangi diraginna myawiranganyadaanyaine. Aawa. Sigunyaviyangi tinnyalyi mwanganyadaanyangi diraginna yawirangadaanyaine. Sare' darevinyi. Yuya nemi tinnyalyi wangadaanya sa yune maalikegaa'na waradengi. Yi daza tinnyalyi mwanganyadaanya sa, sa yuyagaa' yuyagaa' waradengi. Sara yawi'daa diraginna dadaa maa'na neyideina mi'.

5

¹ Sare' darevinyi. Nemi Apozeliyaina mena dara yawi'manigo. Kwaaka davakiya kilaakeji' siminangebita savi wlamwaaiho. Nabaai sa' wo'dalasi'na yinaja' yi nemi ange' piri' kininnakeine. Yi sa' Gotiyai nejaavadesi. Anga daza' a'mwera asaji mannika'na mi'. Sa' Sigunyavi warika'na yada yuyagaa' yuyagaa' waragwothe'na. ² Sare' darevinyi. Dahaa' nemi anga davi simuyiwaala yawi'mwaainivanigo. Nemi tewaanya diraginna dara nevu'nivanike'nanyi. Nemire anga daza' Sigunyavi warika daza'na sara wa'da nemire

kilaakejiki baazi'ma'nya'bi' bwakalimwagata neya'ne'na simuyiwaala yawi'mwaainivanigo. ³ Nebulyasi. Divi anga daza' Gotiyai tivi'na bwakalimwagata neyaja' nemire kuryara kunera yaasiwa'na mwaai'nera mi'. ⁴ Sare' dare'nanyi. Nebulyasi. Nemi siminanga dazavi kuna mwaaihoina Sigunyaviyavina taanginya yibwakidaa simuyiwaala yawi'mwaainivanigo. "Nemi kilaaka sinnawinyaji' yagalya'mavaana!" myawirivanigo. Aawa. Sa' maalikesi. Nemi "Kilaaka gaala nebulya'nanya dazaji' kilaaka barya ya'ne dazajiki naanga naanga galawilawakana!" dawaaji' baazi'ma'nya mudike'bi' baazi'ma'naade'nanyi. Yi sare' naangesi. ⁵ Gotiyai gami' sai neminyi' gaala dazahiri' maarya'neinaavi' mena neyoviravamwaihakelyi. Yi sahwai Kurya Tewaanyari' mena nejaavakelyi. Kurya Tewaanya sai divi Gotiyai yuya nejaaya'ne pimaginiya aaya mudi'nanya sa'b'salyi. Yi Gotiyai sahwari' mena nejaavake'na nemi dara yawi'manigo. Naanga nebulyasi. Sahwai gamire yuya nayaa nejaavadelyi.

⁶ Sarev'idaa'nyi' yi nemire kilaaka mudikeji' nejaavade daza' yuyagaa' nemire simunya' diraginiya neyvaimwadesi. Nemi dara yawi'manigo. Dahaa' nemire kilaakeji' ange'bisavi mwaaiho'na Naangeri' yibwa'nona sahwalyi' gamire angeba mye'mwannamwaalyigo. ⁷ Sare' darev'inyi. Dahaa' nemi gaminyi' limwaga'daa yamarivanigo. Nemi sahwari' tinna mwanganyadaa yamarivanigo. ⁸ Yi nemi diraginiya

neyivaimwannikeine. Sara tivi'na diwo. Nabaai neminyi tewaanya dara nevu'nivan' "Kilaaka dathazikiidaasi yibwa'nawaaji Naangeryawinna gamire angebanna sahwalyi tewaanna ye'mwannamwalaade'nanyi. Yi sa' tewaanyasi." ⁹ Sarevi nemi simunya diraginnna yawi'daanyaine. Yi nabaai nemi sahwalyi ye'mwannemwalaaja' yi nemire anga nebulya'nanyavi yibwa'naaja' Naangerina yuya sabura ya'na sahwari yilaaya wigalaade' naangesira. ¹⁰ Sare' darevinyi. Kiraazitiyai yawibwarya'ne namwaalyisavi nemi yuyaina ku'maayabanna nayaa yima'nabaatheine. Yi nabaai nemijiya gazaizarina Gotiyai "Tewaanyabwina yadei yi sai kilaakejiki wilamwaaida yakebwina tivikita nawi'nya maarana! Nabaai pwai sagaa' kayaa'nanyabwi yadei yi gannyabwina tivikita kayaa'nanya maarana!" kadozi sahiba davaadeine.

*Apozeliyara Kiraazitiyai Gotiyariji
avaaizimunya'na neye'mwagakeburu
widaayadivisavinesu.*

¹¹ Sarevidaa'nyi Naangere diraginyavina lika yabwi yawi'daa a'mweraavire simunya dihaa'bwata yadaanyaine. Yi Kiraazitiyari diraginnna limwabide'na widadaanyaine. Kiri' Gotiyare tinnyari nemire tewaanyabwi ku'maayabanna mena yima'naaba'. Yi nabaai nimi dara limwamanige. Sarimi kwaihire simunyara padaih+rakyaraavi sabwi ku'maayabanna yima'naabake' dingaka? ¹² Yagaala dazavi sarimi neminyina

“A'mwe naw'i'nyarera,” di'neyaw'i'ryide'na mihizi'vanigo. Aawa. Yi daza' sarimi neminne yaya' munyaba makilya'neihire tusa' baasivanigo. Kiri' sarimi sahirina mi'. A'mwe pwaraav'nanyi. Yi sahwaru yune kunya sinna mwasimaginyav'ina kumire yaya' munyaba yaasiwa' makinadivisare. Sahwaru simunyav'ina yaya' munyaba nayaa mamakinyadivisaraav'nanyi. Yi sahwarav' y'inga wi'na wiriv'ikipine'nanyi. ¹³ Sare' darevinyi. Pwara neminyina dara yawipija' “Sahwaru siduta maaya nav'i'navikera sara yivaniga,” kiri' nemi Gotiyar'ine'na yadaanyaine. Kiri' nemi simunya yida'na yawi'daa nemi sariminyi gainwange'na yivanigo. ¹⁴ Sare' darevinyi. Kale Kiraazitiyare yune sa'na wawinyav' neyid'ikaa'bwa'desi. Yi nemi mena dara yawibwa'manigo. Pwai kuminyineba yunebanna wivadaihasamaarya'nei mena balina yakev'idaa'nyi yi dazavi kumi yuyara mena bainikerabisare. ¹⁵ Gotiyai “A'mwe gaala mwaaihata sara yune kumi saraav'ina yawi'div'i' mamwaaibina! Aawa. Yune sahwai kuminyine'na mena balakeri ayina yid'ikaavei yune sahwarina yawi'div'i' gaminyi yadiv'isa'na mwaai'ika!” kada' yuyaraav'ine'na mena balina yakelyi.

¹⁶ Sarevi' sagaa'daasi nemi kilaakebulyiya simunya savire saburina a'mwe aane pwari kwari mamaryawibwarivanigo. Nebulyasi. Sinnawi nemi simunya savire saburina Kiraazitiyari' sara maryawibwaroina

dingaka? Kiri' dahaa' sahwari nemi sasara kuna mamarayawibwarivanigo. Aawa. Gamire nawi'nyabwina nayaa yawirangamanigo. ¹⁷ Sarevi yi nabaai a'mwe kwai Kiraazitiyari wilamwaalajai yi Gotiyai a'mwe sahwari yuna mudika tewaananyi mena wimwaaihadelyi. Gaminyina sinnawinya ayabwi yuya yiwuya yadengi. Yithaanyi! Gaminyina yuya mudikebwi mena yima'naabadengi. ¹⁸ Yuya dazangi aaya kaavilyai Gotiyalyi. Yi sahwai Kiraazitiyarina kigaa' yikamaangeina mwaaloinaji gamiji avaaizimunya'na neye'mwannamwaaihakelyi. Yi nabaai sahwari gaimwagya'ne' gamire yikamaangeraavi sahwariji avaaizimunya'na ye'mwannayima'nya'ne wawinya' mena ne-jaavakelyi. ¹⁹ Nemire yagaalya' daresi. Gotiyai a'mwe Kwaaka davakiyara yikamaangeraavine yuya yiwetawakya yikamaangeraji avaaizimunya'na ye'mwannayima'nakesi. Yi Kiraazitiyari sahwai yuya yiwetawakya sahwara yeta sanna simunya ayahi yawirakai mi'. Yaka sai neminyi gamire yagaala daza' wijiwaakya'ne', yikamaanga sara gamiji avaaizimunya'na ye'mwannayima'nya'ne' newakakesi. ²⁰ Sarevidaa'nyi yi nemi Kiraazitiyare maangi' ma'daa sahwari'neba a'mweraavi wijiwakawadaanyaine. Yi dare'. Gotiyai gami sai a'mwe yuyaraavi nemire maangisi wijiwvaramaa'mani'. Kiraazitiyai gami sarine'na sahwaraavi dara yidangadaanyi. Akai, sarimi Gotiyarina yikamaanga sabwi yagalya'mavapi Gotiyalyi avaaizimunya'na

yima'napiji je'mwannamwaalyila! 21 Sare' darevinyi. Kiraazitiyai kayaa'nanyabwi maayai kiri' Gotiyai yuya kayaa'nanya nemire sa mari'bwaraka yune sarina munyaba yilakaka yi sahwari kayaa'a'mwe nebulya'nanyari wimwaaihakelyi. Neminyina Gotiyai "Kiraazitiyari wilamwaalya'nera nimire yida'maraangebwi kininnakera yima'nipika!" daka neminyineba sara wimwaaihakelyi.

6

1 Nemi Gotiyalyi wawinya ye'mwannayadaanyaina sariminyi diraginna dara yihithivanigo. Gotiyare yanga gaimwangebwi mena daape!. Akai, gaimwanga sa' sarimi yaasiwa' saba sana yagalya'ma'na nyipidika! 2 Sare' darevinyi. Gotiyai jaa!. Dara din'i

"Nimire nawinyaga! kadika gu'neinyi.

Yirika wivadaihasamaasa'neriki gihaimwageinyi."

Nimi yihithivanige. Yithaanyi! Dathahaasagaa! gami nawinyaangegaaki. Yithaanyi! Dahaa! yirika wivadaihasamaarya'neriki.

3 Yi a'mweraavire sivilyangi kurinoji sahwara walarya'ne nemi kayaa'nanya aane piri' kiri' yadaanyaina mi!. "Nemi kayaa'na yaaja' a'mwera tinna wanganapiji nemi Gotiyare yagaalya' wijiwakadaanya wawinya dazavina sahwara yagaala kayaa'nanya nadipidika!" dona kayaa'nanya aane piri' kiri' yadaanyaina mi!. 4 Aawa. Yuyangi Gotiyare widaayadivisara nayaa

yadiv#itabaabi' nemi yuyaraav#na Gotiyare yagaalya' w#dadaanyav#na tewaanyabwi wibwar#dakwadaanyaine. Yi yuyangi' dara yadaanyaine. Kwalaalyagaa' kayaa'nanyangi' diragi'nna nebulya'na da'daanyi'. Yi taanga ney#ma'nadaasi, yi taanginya ney#ma'nada, yi kayaaka y#nig#irasaina mwaidaanyi'.⁵ A'mwera neminyi' malyaji' neradivi' kalavuza ney#rakadiv#saine. Yikamaangera nega'm#jamakwod#v#i' jaka kayaa'nanya nedadiv#saine. Nemi yagi'yagi' waw#nyavi' nebulya'na marulawak#daanyaine. Sawita kwalaalyangi' se mwaryadaanyaine. Nemi miji'na mwaidaanyaine. Sarevidaa'nyi' pwara dara yaw#ranganya'nanyi' "Taanginya wiadaa'nyi' kir#i' Gotiyare waw#nya' kuna yadiv#ita sahwara Gotiyare widaayadiv#ita nebulya'nanyarera."⁶ Nemi tewaanya yida'nanyabwina yadaanyaine. Yadaanyagaa' yaw#ta naw#i'nyabwi limwaga'daa mayagaala yarai dadaanyaina mi'. Nemi a'mweraavi' tewaanya naw#i'nya pada'galayadaanyaine. Nemi Kurya Tewaanyare yange kin#nnakeine. A'mwe Kiraazit#yareraav#na tewaanya nevu'nya sabwi yune maangi'nanya'na mi'.⁷ Nemi yagaala nebulya'nanya' wiji#wakadaanyaine. Nemi Gotiyare diragi#nyavi' gam#re waw#nya' yadaanyaine. Sareinaav#na pwara nayaa dara yaw#p#ine'na "O, sahwara Gotiyare widaayadiv#ita tewaanyara daaka!" yi nemi sara yadaanyaine. Nabaai tewaanya yida'maraangebwi limwaga'daa, aangas#ri' kwaari'mas#ram#nya' wa'da kwanaamiri'

saabya' wa'devaai' kayaa'nanyabulyi nemi mala tannadaanyaine. ⁸ Nemi'nyine wawinya'na a'mwe pwara nemi'ne yaya munyaba makidivisaine. Yi pwara nemi'ne yaya kwaakewi marulawakadivisaine. Nemi'nyina pwara yagaala kayaa'nanyaji bulayagaalyaji dadivisaine. Yi pwara a'mwe pwaraavi nemi'nyina widadivisaine "Sahwara wawinya' tewaanya yadivisarera." Apozeliyaina Gotiyare wawinya' kuna nayaa yadaanyaine. Yi a'mwe pwara nemi'nyina yagaala ge dipija' nayaa yadaanyaine. Pwara nemi'nyina dara yawi'divisaine "A'mwe sara kwaasi yagaala dadivisare." Kiri' aawa. Nemi yagaalya' nebulya'na dadaanyaine. ⁹ Pwara neyawirangadivitaina mi'. Kiri' a'mwe kwalaalyara neyawiranganamaa'divisaine. Nemi baidaa kiri', yithaanyi, nemi gaala kuna mwaiho. Gotiyai nemi'ny'i yavada'gala ya'nei tamamwaaihaderabisaine. Kiri' sahwai yuna maneramakyadeine. ¹⁰ Nemi'ny'i kale neyivani'. Kiri' yuyagaa' nemi yilaaya yadaanyaine. A'mwe gilyivita maayainabi' mwaidaanyaine. Kiri' nawi'nya kininnakeina nebulya'nanya a'mwe kwalaalyaraavina wjavadaanyaine. Nemi gilyivita aane pimili' kimili' kininnakeina mi'. Kiri' yuya nawi'nya gazaza limwagakoine. Yi yuya sanna yadaa dara wibwaridaakwivanigo. Sahwaina Gotiyare widayadaanya nebulya'nanyaine.

¹¹ Sarimi Koridi mwaalyaihi, nemi sariminyi yagaalya' ku'maayaba jalikurakya'neina maanga naangeva'na tavadiwo. Nemi

sariminyi maarya'neba nemire kale naanga yima'niwa'.¹² Nemire simunya' sariminyina tihirakamaremwaala miwo. Aawa. Neminyi sariminyina teawaanya nevu'nivani'. Kiri' sarimi saihi sarinnya simunya' tihirakamaremwaaiha'. Yi nemiji avaaizimunya nebulya'na mamwaalyiga'.¹³ Ganimaangei gannya kaimiraayangwi widadevaaihi' dahaa' yihithivanige. Nemire dazabwina ayina tivikiryane' neminyi maarya'neba sarimi kwaihiyi sarimire kale naanga yima'nana!

¹⁴ Mu'nyadivisara sahvara yi pwarabisare. Sarimi kumirebwina mye'mwannayamaripina! Yadivi' kunnya sahvaraavire saburi gaimwanga mipina! Sare' darevinyi. Yida'maraanga sabulyi kiwinyavi galazekivala sabulyi sawaai gatha'dara ye'mwannayikadewaalaka! Baakesi jihinyasi gatha'dara ye'mwannayirakurikadewaalaka!

¹⁵ Nabaai Kiraazitiyai Kamaalyalyi avaaizimunya'na ye'mwannadatheidi ngaka! A'mwe Kiraazitiyari diraginna limwadelyi Kiraazitiyari malimwagyadelyi saraai simunya gave piri'na limwagikaderaai daa!

¹⁶ Gotiyare anga teawaanyasi kwaasigotiyaraji marirakurakipi'de' daaka! Sare' darevinyi. Nemi Kiraazitiyareina Gotiyai gaala kininnakere anga teawaanyasira. Gotiyai jaakabaaibisasi. Yi dara din'i'

“Nimi sahvaraavi wilamwaalideinyi. Sahwaraayaba kaanya yamarideinyi. Kumire Gotiyainyi mwaalideinyi Nimininyine a'mwera mwaaihi'dere.”

17 Sarevi Naangei ayahi pirisi jaa'

“Pwaraavi tinnyaba nayaa jahalya'mayila!

Sahwaraavi menyawi sarimi dimwaalyila!

Girikita'nanya aane piri' kiri' malimwabina!

Nimi sainyi sariminyi yihimaardeinyi.”

18 “ ‘Nimi sariminyi Sirinimaangeinyi
mwaalideinyi.

Sarimi nyigwaalaangeihilyi nyiraavaangengihilyi
dimwaalyideihilyi!’

Naangei diraginya yuya kininnakei sasara
dadelyi.”

7

1 Sariminyina tewaanya nyivu'nadeihi,
yuya daza, Gotiyare yune naanga nebulya'na
wija daza mena kininnakeine. Sarevidaa'nyi
yi nemi yuya girikita'nanya kilaakejikiyaji
kuryariyaji duimwagasi'naana! Sara yawaaji
tewaanya yida'maraangeina mwalaana! Sare'
nemi Gotiyare diraginyavina lika yadaa
nawinya giri'maayabwi yuyagaa' yunebanna
neyima'nade'nanyi.

2 Sarimire simunyi neminyineba
dinebasamarimwaaihila! Nemi sarimijiya
a'mwe aane pwar kwar yiwetawakya piri'
myadaanyaine. Nemi aane pwai kwar
kayaaka migalakyadaanyaine. Nemi aane
pwai kwar kwaasi widadaa gamire gilyivisa
mamwagi'nyadaanyaine. 3 Nimi sariminyi
yaasiwa' yagaala yihizidaya'ne' majivanige.
Sare' darevinyi. Nimi mena dara diwa. Nemire
simunyavi sarimi wlamwaaiha'. Sarevi
yihigaimwagya'neina sarimi kabalapi nemi

sarimiji ye'mwannabaina yaade' tewaanyasi. Yi nabaai sarimi gaala kuna kamwaalapi nemi sarimiji gaala ye'mwannamwaaina yaade' tewaanyasi. ⁴ Nimi sariminyina yilaaya yadi diraginna yawi'di ku'maayaba yihizalukurakyivanige. Nimi sariminyina wi'nena sariminyine yaya' munyaba makimanige. Yuya taanginya neyima'nade sangi sarimi yiwa'daasa'na nimire kuryari yunebanna nyivaimwamani'. Nabaai yilaaya naange' niminyi yuneba yeku'nawiresi'mani'.

⁵ Taanginya sare' darevinyi. Sinnawi Piroviji Maazathoniyana bi'ma'mwa'dohaa' dazimagi kimagiji nemire kilaakejiki kwaamu'na mamwaalyiwa'do. Aawa. Taanginya dala pininna pininnanya neyima'nwa'dikengi. Yi mwasimagi neminyi maiyagaalyaji maangeji warina. Yi kusimagi nemi lika yina. ⁶ Sare' kiri' taanginya kininnakeraavi yivaimwadei Gotiyai neminyi neyivaimwamwa'. Yi sai Taaitazari maryasaabakei neminyabanna bi'ma'mwakevi sai nemire simunyavi neyivaimwamwa'. ⁷ Taaitazai neminyabanna bi'ma'mwake'na yune dazahirivina Gotiyai neyivaimwamwake' mi yiwa'. Aawa. Sarimi Taaitazare simunyavi yivaimwannana kiwa'daa' sahwai yagaala datha' makabiwakevi Gotiyai nemi kwainaavire simunyavi neyivaimwamwa'. Taaitazai dara nedwa'. Sarimi niminyi tinna wanganya'na tewaanya yihivu'nada yi sarimire simunya' kinna divani'. Sara yadivi' nimiji avaaizimunya'na ye'mwannamwaalya'na sarimi simunya kwalaalya yawi'maniga'.

Sarev+daa'ny+ n+mi+ y+laaya naanga naanga y+ivan+ige. ⁸ Sare' dare'nany+. N+mi+re p+kar+iy+ikwiav+ yagaala d+rag+inya' sar+im+re kale y+higaimwa'd+ika kir+! y+ n+mi+ yagaala dazav+na n+mi+re s+munya' taanga many+van+!. Nebulyasi. Kigaa' sagaa' s+munya' taanga nyakeiny+. Kir+! dahaa' aawa. N+mi+ dara yaw+rangaman+ge. Paaziya daza' sar+im+ny+ s+munya' kale y+higaimwa'd+ikesi. Kir+! nabaai sa' maal+kegaa'nesi. ⁹ Dahaa' n+mi+ y+laaya y+van+ige. Sar+im+re s+munyav+ kale y+higaimwa'de'na y+laaya mivan+ige. Aawa. S+munya' kale y+higaimwa'de' sar+im+re s+munyav+ mud+ikebwi yaw+ramaa'mwa'daasa'nany+. Sare' darev+ny+. Sar+im+ny+ s+munyav+ kale daza' Gotiyai maray+hima'n+wa'daavad+ikesi. “Nem+re paazi+yav+ya yagaalya' Koridi mwaalyaraav+ kayaaka aane p+im+li' k+im+li' ny+galakad+ika!” kado Gotiyai sara y+wa'd+ikesi. ¹⁰ Sare' darev+ny+. Kale daza' Gotiyai marima'naabade daza' y+ nemi a'mweinaav+ s+munya mud+ikebwi neyadesi. Y+ sasare dazaburi Gotiyai nem+ny+ nevadaihasamaa'dely+. Sarev+ s+munya mud+ikebwina nem+re s+munyav+ taanga maneyanna! Kir+! kale wiabwi yaasiwa'nanyabwi a'mwe Kwaakevak+yaraav+rebwi y+ daza' baryabwi gavebwi marima'naabadesi. ¹¹ Sare' darev+ny+. Y+thaanyi, Gotiyare kale daza' y+ dazah+r+sa' sar+im+ny+ dala p+n+inna p+n+innanya tewaanya naw+nyabura y+h+marima'n+wa'daavad+ikesi. Yavada'galya'na sar+im+ny+ mwolaval+mwigata y+hiwa'd+ikesi. Y+ yagaainakeihi sar+im+re

yagaalya yavada'gaimwa'daasange! Yi Gotiyai yihidikaab'wade' yi sarimire yiwetawakya'na wagila maa'mwa'daasave! Yi Gotiyare diraginyavina lika naanga y'wa'daasave! Neminyi tinna wanganya'na sarimire simunya' simuyiwaala y'wa'dikeve! Yi tewaanya'na diraginna yadivi' kayaa'nanya'na diraginna nayaa y'wa'daasave! A'mwe dazai yiwetawakya'na tivikita naange' y'wa'daasave! Yuya sangi sarimire sabwi gamire yiwetawakya savina ku'maayaba dara y'ima'nivani' "Sarimi yiwetawakya' maayaihiyi."

¹² Sarevi, sinnawi sariminyi paaziya' yidave' daza', yi a'mwe dazai yiwetawakya mena yaka gave sarina yawirena yidave' mi'. Nabaai sahwai a'mwe pware' kayaa'nanyabwi yingakakerina gaverina yawireinyi mi'. Aawa. Nimi sarimire simunya diraginyabwi ku'maayabanna marima'naabya'na yidavesi. Yi Gotiyare tinnyari sarimi tewaanya nawi'nyabura neya'neihi neminyina tewaanya yihivu'nivanike'nanyi. Sarimi sara yawiramaata'ne' yidave'nanyi. ¹³ Sarevi nemire simunyavi tewaanya neyivaimwadivisaihiyi. Sare kiri' neyivaimwange' gave' mi'. Nemi yilaaya naanga yuna yivanigo. Sarimi yuyaihi tewaanna yadivi' Taaitazare kuryai kave mena yimwaaihiivanigasa'na sahwai yilaaya yivani'. Gamire yilaaya sasare dazabwi wangadaa yi nemiji yilaaya naanga yuna yivanigo. ¹⁴ Sare' dare'nanyi. Sinnawi nimi Taaitazari widadi sariminne yaya' munyaba makile daza'na, yiwetawakya mye'na,

nimire yagaala dazavi wagila mamaariwa. Aawa. Yuya yagaala nemi yihitho daza yi naanga nebulya'nanya warikabaaibi' yi savi Taaitazaryaba sarim+inne yaya' munyaba makilo yagaala daza' yagaala naanga nebulya'nanyasi. ¹⁵ Taaitazai sarim+nyaw+inna kabi'mava' yi sarimi "Yiwetawakya nyaadikaji," lika yiswaaineva sahwar+ maaresalyi. Yi sarimi yuyaihi sahware yagaalya' mid+inna yesaihiyi. Sahwai yune dazah+bwina yawi'da yi gamire simunyai yawiririk+rakya sarim+nyaw+inna yuna wa'daawadelyi. ¹⁶ Dahaa' nimi nebulya' diraginna dara limwamwa. Sarimi saihi yuya yidata sabura nayaa nebulya'na jideih+iyi. Yi sasare saburi nimi yilaaya yivanige.

8

*Kiraazitiyar+ limwadivisara
kwiya'mweraav+ina yanga wijaavesa'nesi.*

¹ Nya'mweihi, dahaa' nemi dara yihizi+wiryana! Piroviji Maazathoniya Kiraazitiyare kusilaanyangiyaraavi Gotiyai yanga wigaimwadaa'nyi sahwar+ naw+nyina yiswaasare. ² Kiraazitiyar+ina sahwar+av+ taanga naange' kima'na' yi sahwar+av+re simunyavi taanginya sabwi yaamiji yiji+waala yakebulyi. Yiji+waala dazaburi sahwar+ kayaa'na nebulya'na mwaalesare. Kiri' sahwar+ yune yilaaya naanga nebulya'nanya' kin+innakere. Nabaai sahwar+ yune kewew+ini gily+ivita maayare. Yi sarevi dazahwar+ piwinya kwiya'mweraav+ gaimwagya'ne

simunya diraginna nayaa yawiramaa'divisare.
³ Sare' dare'nanyi. Nimi nayaa wangadi
jalikurakivanige. Kumire nigwia maalikengi
nigwia yanga wijaaya'ne kininnakera
yune sara wijaavadivisare. Yo, sahibur
wawila'divi' nigwia piniji wijaavadivisare.
Kunnya simunyaburi middivi' nigwia daza
wakadivisangi. ⁴ Yi sawara neminyi
diraginna nedadivi' yidaanganna “Wawinya
Gotiyare tewaanyara Juthiya mwaalyaraavine
yang gaimwange' nemi wijaaya'neinaavi
dinejila! ‘Naanga sabwi mi nyaadika!’
dona yihithivanigo. Kave mwaaihasa'
aawa! Kusilaanyangiya pwaraji sara
yirakurayaana!” ⁵ Sinnawi nemi dara
limwagaro. Sawara nigwia pini pwaraavina
wijaavipi'dererera. Sare kiri' yune sasare
yipine'na mi'. Aawa. Aayagaa' Naangerina
kuminyidaasi wijaavineva Gotiyare simunyavi
middivi' yi sara ya'nera nemi kwainav+naji
kuminyi wijaaviniwaa'. ⁶ Maazathonya
mwaalyaraavine sare' nemi Taaitazari yaamiji
widiwo. “Yi sinnawi sagaa' sawai pwaraavi
nigwianna wawinya wigaimwanga daza' Koridi
mwaalyara ya'neraavi gaai widakabaaibi'
widihaa'bwarana! Sarevi sawaraayaba yanga
gaimwanga nawi'nya sa' nayaa yi'mwannana!”
yawirona sara yaamiji widiwo. ⁷ Yuyaburaavi
sari mi yunebanna tewaanna yadivisaihilyi. Yi
Kiraazitiyar diraginna yunebanna limwadivi',
yi Kiraazitiyarine yagaala yuna diraginna
wijiwaakadivi' yi yune simunya nawi'nya
kininnakeihilyi. Yi sarevi sari mi Gotiyare

wawinya ya sabwina yunebanna nebulya'na dikaa'divi' yi neminyina yunebanna nebulya'na yihivu'nadeihilyi. Yi sasare saihi yunebanna tewaanna yadivitabaab+! dahaa' "Yanga gaimwanga nawi'nya dazabwi yi, yunebanna wijaayabwi yaana!" dapiji sara jila!

⁸ Savina nimi kiwinya dakya'ne' mihizivanige. Aawa. Maazathoniya mwaalyara a'mwe pwaraavina nebulya'na dikaa'divi' tewaanya yadivisanna jalikurakena sarimire kale saburi yaamiji yihivanige. Sa' nemi yawiraade'na sarimire kale sabwi sa' naanga nebulya'nanya' sawaraavire'bisasira. ⁹ Sare' darevinyi. Sarimi mena dara yawi'maniga'. Nemire Naangei Jizaazai Kiraazitiyare yanga gaimwanga nawi'nyaange'na yake'nanyi. Yi sawai nawi'nya naangengi aaya kaavilyalyi. Kiri' sariminyi gaimwanga yihya'nei gilyivita maayai yima'nakelyi. Yi sariminyina "Waryaanya sabwi limwadinyavi nawi'nya naange kininnakera yima'nipika!" daka sarei yima'nakelyira. Sara mena yawi'maniga'. ¹⁰ Yi yihithivanige' kiwinya'na mi'. Dahaa' daza' nimire simunya' yihizwaakivanige. Sare' darevinyi. Yi dare' sariminyine tewaanyasira. Kwaramenanyariki sarimi wawinya daza' mena dihaa'bwareta gave'na mi'. Aawa. Sareihi sinnawi sarimire simunyavi wawinya ya'na tewaanya kuna yihivu'nakeihilyi. ¹¹ Yi nabaai dahaa' wawinya daza' ya'ne' sarimi nayaa yimwannyina jideihilyi. Kigaa' daza'na simunyavi yime'nya'b+! dihaa'bwaretabaabi' sarinnya

gilyivisangina yinigevanna wi'nanya'na sarimi yunebanna yime'nya'bi' jiwagyila! ¹² Sare' darevinyi. A'mwei nigwia wijaaya'na tewaanna wivu'najai yi Gotiyai dazare sabwina tewaanya wima'nadelyi. Gotiyai yuya a'mwe dazari wiiwarajanna kunya yawi'da yi sahware wijaavade sanna maryawibwa'delyi. Sahwari nigwia naanga muwarikenna maryawibwa'dei mi'. ¹³ Sare' darevinyi. "Sariminyi taanginya yihyana! Pwaraavi wivwa'bwarakana!" dena yihithivanige' mi'. Aawa. Sariminyiji pwaraaviji avaina yima'nya'ne'nanyi. ¹⁴ Yi dathahaasagaa' sarimire gilyivita kwalaalya yi a'mwe gilyivisanna yinahune yima'nadivisaraavi yunebanna wiadengi. "Yi sarevidaa'nyi divi sarimi gilyivisanna kune yima'nipija' yi sahwaraviji kwalaalya naanga wiiwaradera sariminyi gilyivisa yunebanna yihipika!" dena yihithivanige. Yi sasare dazabwina sariminyiji sahwaraviji avaina yima'nade'nanyi. ¹⁵ Sara yapiji yi dare' Gotiyare bukuyavi dinikabaaibisasi. A'mwei wapaaya manaaya kwalaalya maaraka sai kwalaalya naange kininnakai mi'. Nabaai a'mwei maali'na maaraka sai wigainadei mi'. Yi sasarebaaibi' naange kininnakeihi mwaaibizaihi wigainaderaavina yanga duzaayila!

Taaitazalyi pwaraalyi yange'ne wawinya'na Koridina wawesa'nesi.

¹⁶ Nimi Gotiyari suya widivanige. Sahwai Taaitazare simunyavi yidikaa'manikelyi.

Sara yadaa'nyi Taaitazai nemibi' avaaína yawi'mani'. Yi sai kwalyi sariminyine'na tewaanya wivu'nivani'. ¹⁷ Sare' dare'nanyi. Sai nemire yivaimwange' maa'mwa'. Nabaai sai kwalyi wawinya savina tewaanya yaginna wivu'nivani'. Sarevidaa'nyi yune gannya saburinyana' sariminyawinna wiwaka. ¹⁸ Yi nemi neya'mwe pwai maryaasiwoyai salyi ye'mwanniguwai. Yuya kusilaanya sangi neya'mwe dazai yagaala tewaanya' wijiwaakyarine yaya' munyaba makimangasalyi. ¹⁹ Nabaai yune sasare'nanya' mi'. Aawa. Kusilaanyangine a'mwera widahilakiwa'daata sai divi nemiji ye'mwannayamarya'nelyi yanga gaimwanga daza' Jeruzaalemine Kiraazitiyaraavina makwawaade'nanyi. Yi nemi wawinya widayadaanya daza' yi Naangerine byaanna diraginiya' a'mweraavi yibwaridaakwia'nesi. Nabaai nemire simunya' gilyivi'maayaraavi wigaimwagya'ne daza' ya'na neyiwirivanike' yibwaridaakwia'nesi. ²⁰ Nemi yanga naanga maremwaala'na yivanigo savine yiwetawakya'na nyima'nadika! Sare' a'mwe aane pwai kwai yagaala kayaa'nanya' nadathika! Sarevidaa'nyi yi nemi neya'mwe dazai ye'mwannigwikade'na maryaasiwo. ²¹ Sare' darevinyi. Tewaanya nawi'nya yade sabwina nemi yawirona yune Naangere tinna sarinanna mi'. Aawa. A'mwe kwaraavire tinna kwariji' nayaa yivanigo. ²² Nabaai nemi neya'mwe pwai maryaasiwoyai sarei saraalyi ye'mwanniguwa'. Kwalaalya saaminyagaa'

nemi sari wawinya dala pininna pininnanyangi yidakwasangadaanyalyi. Yi nemi sari tinna wangadaawoji Naangere wawinya ya'na diraginna yadelyi. Dahaa' sai "Sarimi Koridi mwaalyaihi yune nawi'nyaangebawina jide'na," diraginna limwaga'manikei wawinya daza' ya'na dikaa'da diraginya yaginna yivanikelyi. ²³ Taaitazarina sarimi dara jawiranganyidelyi. Sai nimiji ye'mwannayadasalyi. Sariminyine'na nimiji avaiwawinyalyi. Yi neya'mwe pwaraai saraarina sarimi dara jawiranganyide. Kiraazitiyare kusilaanyangine yawisanna yadisaraalyi. Yi saraai kirinnya wawinya savina pwara Kiraazitiyarine yaya' byaannake! munyaba makidivisaraalyi. ²⁴ Sarevidaa'nyi sarimire kale' saraavi nayaa jivwaridaakwila! Nabaai sarimi nawi'nya ya'ne' sariminyine yaya' munyaba makimwo sa' nebulya'nanya' jivwaridaakwila! Yi sahwaraji kusilaanya anga geva gevanya a'mweraji naanga nebulya'na yihyawirangabi'de'na sara jila!

9

¹ Sare' da'darevinyi. Yanga wijaaya' Gotiyare tewaanyaraavi widaaya'ne'na sarimi mena yawi'maniga'. Savina yi nimi yagaala saaminya' mida'muna! Sarevina manyigainyadesira. ² Sare' darevinyi. Nimi sarimire simunya' yihithikaa'manike' tivi'na yawi'manige. Yi Maazathoniya mwaalyara Kiraazitiyareraavi sariminne yaya' munyaba makidinyainyi. Yi dara widivanige. Kwarama sinnawinyavi Piroviji Giriza mwaalyara daza' aaya mudina

yamaasa'na mena yoviravalimwagata yesare. Yi sahwara sariminyina kadika wi'neva wawinya dazahiri' ya'na diraginya yadaapi yi daza' sahwara kwalaalya kwaraavi yidikaavakesi. ³ Sare kiri' yanga wijaaya'ne wawinya savina sariminyina yaya' munyaba makilya'na sa' yaasiwa'nanya' nyima'nadika! Sare'na sariminyawinna nya'mweraavi maryasiwaabe. Yi sinnawi nim+ widevaab+ yi sarim+ nayaa sara yoviravalimwagata jemwaalyide'na maryasiwaabe. ⁴ Sariminyawinna Maazathoniya mwaalyara nimiji nye'mwannigupijara sarim+ nayaa yemwaala myadapi tinna yihwangabiza'na yi nem+ wagila nama-raadika! Yi nabaai sarim+ kwaihiyi wagila yihye'mwannamaraadeihi dingaka! Nem+ sariminyina diraginna nebulya'na yawirakadaa sariminyina diraginna sara wido. ⁵ Sarevidaa'nyi nim+ dara yawi'mwa. Nya'mwe saraavi nim+ nayaa diraginna widima! Kum+ sinnawi niminyi waanapiji sariminyawinna bi'mapi'de'nanyi. Yi sarim+ tewaanya naanga yanga wia'neihi mena dahesa' nayaa tivi'na yovirawakapiji ba'mujiyagaa' nigwimaaya saraavina maryasaabya'ne' mena waradesi. Yi yanga daza' tewaanya naanga yanga wia'bi' yi yemwaala yadesi. Nem+ yihimwagi'nadaanya' nigwiabita' mi'.

⁶ Yi pwaraavina yanga wijaayabwi daresti. A'mwei tika munne maali'na buridei, nabaai sai yune tika munne maalikenna maaradelyi. Yi a'mwe tewaanya naanga yange'na buridei, nabaai sai kwalaalya

naanga yange'na maaradelyi. ⁷ Sabaabi' sariminyidaa'nya gazaizai gannya simunyavi mena yawirakoji yi yune sahiburina midinoji sara wijaavana! Yi sai yanga wijaaya'na simunya' taanga nuyadika! Sahwai dara yawi'da "A'mwera diraginna nyivanigasa'na yi sasare sahibusi wijaavangeinyi," nujaavadika! Sare' darevinyi. Nigwiyange'na a'mwei yilaaya yaderina yi Gotiyari tewaanya wivulnivanike'nanyi. ⁸ Yi Gotiyai sahwai sariminyine'na yiniga wi'na yannelyi. Yi sariminyina yanga gaimwanga yuya wijaavada yi sarimi nebulya' yunebanna yihyadeihilyi. Sahwai "Yuyagaa' yuyangi gilyivita yuyanna kininnakeihi myihigainyadeihi yiniga nebulya' wi'nanyaihi yuna mwaalina jila! Yi wawinya tewaanya yuya sa ya'neihi dimwaalyila!" dada yunebanna yihyadeihilyi. ⁹ Gotiyare bukuyavi yangeraavina dara dinikabaaibisasi.

A'mwera wia burija'ne piraihrayiwinasinamaryadivitabaai
A'mwei gilyivi'maayaraavina naanga yanga
wijaavakelyi.

Yuyagaa' yuyagaa' sahware yida'maraangebwi
waragothelyi.

¹⁰ Gotiyai wia burija'ne a'mweraavina yanga wijaavadei yi sahwai wapaaya dala pininna pininna nya'ne yihizavadaawori sareihi yuyaihi tika nayaa dinyideihilyi. Yi Gotiyai gilyivisangi (wiangi) sarimi yiniga wi'nanya pwaraavina wijaaya'neihirina yihizaavadelyi. Yi a'mwera tika wapaaya wia buridivisa yi sare naanga yima'nadevaabi' sarimire gilyivisa naanga (sila naanga, wapaaya naanga) yima'nadaa'nyi

yanga naw'i'nyabwi yida'maraangebwi naanna kuna jideihilyi. ¹¹ Yi gazazangi sarimi gilyivita kwalaalya yunebanna yihwakadeihilyi. Gilyivita kwalaalyangidaanya pwaraavi yanga yiniga wi'na wijaaya'ne yihwakadeihilyi. Yi nemire wawinya savi sihumale sarimire daza' neya'mweraavi gaimwagathe'na Gotiyari "Su! Su!" widipi'dere. ¹² Sare' dare'nanyi. Gotiyare a'mwe tewaanyaraavi gaimwanga ya'ne' jide wawinya', sasare saburi sahwaravire gilyivisanna mudaasaderaavi yunebanna yivani'. Nabaai yune sasare' mi'. Aawa. Sasare dazaburi kwalaalyara yadaapiya'na yilaayas Gotiyari "Su! Su!" wijasi maanga yuneba wiresi'nawidihita yade'nanyi. ¹³ Yi sarimi wawinya yivanigata daza' sarimire yadivita sabwi ku'maayaba marima'naabathesi. Yi sarimi Kiraazitiyare yagaala tewaanya' nayaa jalikurakadivisaburi kwaakewi mwaaihasa'naji yi nabaai Juthiya mwaalyaraavina yanga naange' nayaa wjavadaapi sahwaraji a'mwe yuya pwara kwaraji sarimire ye'mwannayivanigasa' wangabi'de'naji yi sahwaru Gotiyar'ine yaya' byaannake' munyaba makibi'dere. ¹⁴ Nabaai sahwaru yawipi'de'na "Gotiyare yanga gaimwange' wavila'nike' yihwaradesi." Sarevi yi nabaai sahwaru sariminyi wanganya'nera sariminyina tewaanya wivu'naderera. Yi sara yadivi' Gotiyari "Su! Su!" widadivi' yidaanganna kyapiji sahwaru tewaanya yihyatheihilyi. ¹⁵ Gotiyai gannya Gawaaliki yanga nejaavakelyi. Yanga sa' naangaangesi.

Nemi daza' yiniga wi'na yunebanna yawi'daa daathe' mi'. Yi yanga daza'na nemi Gotiyari "Su! Su!" diraginna widaana!

10

Apozeliyaraavi kayaakyagaala widesa' Poli walamarakake'nesi.

¹ A'mwe pwara nimirinyina kwaasi yagaalya' dara dadiviki "Sahwai nemiji neye'mwannemwaaida gami sarine yaya' kwaakewi marima'nadelyi. Kiril' nabaai gami menyaba mwaaida sahwai yagaala diraginaange nedasaabadelyi." Polinyi nimi sainya Kirazitiyare kwaamu'nanyabulyi bwiwanna maremwaalyabulyi nayaa mididi sareinyi kave diragina yihithivanige. ² Yi dara yihidaangamanige. Dividaa'nyi nimi sarimirinyawinna kabi'mava'muji yi a'mwe sahwara mala nayaa yiwannipika! Akai, a'mwe sahwaraavi nimi yagaala diragina' nudiwika! Sahwara neminyina dara yawi'divisa'na "Kilaakejikiya yawita saburi yamaryadivikira," nayaa diragina widdide'nanyi. Sara diragina yawirangamanige' kiril' baa'nana! Simunya yarai kyavada'galayawirapiji sara myavada'galyi yihyiwineinyi. ³ Kilaakejikiya yawita saburi myamaryadaanyi. Sare' darevinyi. Kilaakejiki yamaryadaa kiril' kayaa'nanya neyima'nadaa'nyi kilaakejikiya yawita saburina kayaa'nanya dathiwadaanyaine. ⁴ Sare' darevinyi. Yuyaji mala tannya'ne sa nemi limwagako

sa kilaakejikiya yawita saburiyanna mi'. Aawa. Sa Gotiyare diraginya' kininnakenna yikamaangeraavire maihurita diraginya yiniga wi'na wo'dalasi'nade'na. ⁵ Nemi sahwaraavire simunya wo'daidaanyaine. Nabaai yuya sabura munya ke'beva daa'da a'mwera "Gotiyari yawiranganaana!" dadivi' yadivisaraavine tusa' kaanya tih'i'devura, sabura kiburaji wo'daidaanyasi. Yi sara yadaa nemi a'mweinaavire yawita yuya sa Kiraazitiyari midinya'nengina kalavuzayiralimwaga'daanyaine. ⁶ Yi nemi mena yawibwa'nona sariminyina yemwaala yigo. Sarimi nemire yuya yagaala sa dinemidinyidehaa' yi nabaai nemi yagaalya' galazekivaidivita a'mwe yuyaraavi kumire kayaa'nanyabwina wirivikiraadeine. Sareina yawiralimwagata yivanigoinera.

⁷ Sarimire tinnyangi yihwarika dazanna Apozeliyainaavinnenna nayaa jawiranganyila! Yi a'mwe pwai kwai yune gami sarina diraginna limwaga'da "Nimi Kiraazitiyareinyi mwaihe," yi sai simunya' ayahi yawirana! Gannya simunyavine'na yoji dara yawirana! "Yi nimi Kiraazitiyareinyi mwaihebaaibi! Poliji Apozeliya pwaraji Kiraazitiyarera." ⁸ Sare' darevinyi. Naangei neminyina sarimire diraginna limwangebwi diraginya yihiwagaathe'na gannya diraginya' nejaavakeine. Sa' sariminyi kayaaka yihigalakaade'na mi'. Yi diraginya sa'na nimi yune neminne yaya sanna makilaaja' yi sa'na wagila maarideinyi mi'. ⁹ Kiri'

nimi “Aala!” diwa. Sarimi niminyina dara yawi'maniga! “Gamire paazyangi neminyi lika dahaneyiri'gaimani!” Sare' sarimi yawisa'na “Aala!” dadi mi'na yihithiwa. ¹⁰ Sare' dare'nanyi. A'mwe pwara niminyina dara dadivisare “Yo, gamire paaziya naanga kininnake yi yagaala diraginya kininnakengi. Kiri' gami sai kabi'mavoji nemim gamire kilaakejiki tinna wangadaawori diraginya maayalyi. Yi sagaa' gamire yagaalya' yaasiwa'nanyasi.” ¹¹ Sasarera nayaa dara yawipika! Nemi sariminyi menya keibeva yibwa'nadozi yune yagaalya' sariminyina pikarya yida'daanya' yi nabaai nemim sarimiji yihye'mwannamwalaaja' nemim avaananyabwi yagaala sa' sara yihyadaanyasi.

¹² Sare' darevinyi. Nemi simunya kwalaalya yawi'manigo. Yi “A'mwe pwarabi' avaananyainera!” nemim yiniga wi'na daanneina mi'. Sahwara yune kuminne yayanna munyaba makinadivisare. Yi nemimre sabulyi akwaraavire sabulyi yiniga wi'na maryawibwaraanneina mi'. Aawa. A'mwe dazara yune kumimre saburine yaamijita wakadivi' “Tewaanyainera,” maryawibwa'divisare. Sahwara kumimre yawisangina maryawibwa'nadivisare. Yi sarera simunya maayare. Kwaakevakiyara kunnya yawisabwina nayaa maryawibwa'nadivisara mi'. ¹³ Sahwara sara yadivi' kiri' Apozeliyaina nemimne yaya' munyaba makilyavina nemimre yitaasavi wavilavaadeina mi'. Aawa. Yitaata savim Gotiyai yaamijita wakada yitaasa' maryawibwaraka yanga

nejaava'. Nemi yitaata yune dazahirivina mididaanyaine. Nemi sahirivi kusawi midinona sarimi kwaihiryawinna bi'mavoine. ¹⁴ Sare' darevinyi. Nemi sariminyawinna mabi'mayi yaaji kwaji nemire yitaasavi kavari'mavaadikebaaibi' pilaanna nemi saina diraginna wavila'manigoina mi'. Aawa. Sare' darevinyi. Sinnawi sariminyawinna bi'mavona sariminyawinna Kiraazitiyarine yagaala tewaanya' yihimakabovina sarimi nemire yitaasavi mwaaiha'. ¹⁵ Wawinya piningi a'mwe pwara gaalyagaa' miraagikiresangina neminne yaya' mamakilyivanigo. Nemire yitaasavi Gotiyai dahilakaka wawinya savi mavari'mayona sara mi. Aawa. Nemi simunya diragina dara yawirakivanigo. Sarimire diraginna limwangebwi sarimire simunyavi diraginaanga mena kima'nojii nemire yitaasavi yinigeva wawinya sa' yunebanna yi'mwannaaade'nanyi'. ¹⁶ Yi sariminyi bulyimagi mwaaihata kwaaka pimagina Naangerina kadika mu'nyadivisaraayawinna nemi yagaala tewaanya' wijiwakamaryaade'nanyi. Nemire yitaasavi pari'makwiya yaadeina mi'. A'mwe pware yaamijita wakinikeba mena yakengina neminne yaya' yaasiwa' makilaanneina mi'. "Wawinya sa' nemi saina yagosira," majadaanyainera. ¹⁷ Aawa. "A'mwe gaminne yaya' munyaba makidei yi Naangerina gaverina nayaa sara makilana!" ¹⁸ Sare' darevinyi. A'mwe yune gannya yaya'na munyaba makilajai yi dazari Gotiyai yawiramaardei mi'. Aawa. A'mwe Naangei gamire yaya' makilajai yune

a'mwe sahwarĩ yawĩramaaradelyĩ.

11

Polĩ kwaasi apozelĩyaraavĩrebwi ku'maayaba jalĩkurakake'nesĩ.

¹ Akai, dara nyĩvu'nĩvanĩkeinyĩ. Nĩmĩ sĩmumaaya maali'nanya yagaala kave du'nyĩla! Maanga yarai manyĩdĩpĩnera! Kiri' yĩhĩthĩwe' baa'neka! Sarĩmĩ maanga majĩ, nayaa kave nyu'nadĩvĩsaihĩlyĩ. ² Sare' darevĩnyĩ. Gotiyarĩdaa'nya wĩvu'nyabwina sarĩmĩnyĩne tewaanya nyĩvu'nadeihĩlyĩ. Gotiyai a'mweraavĩna “Nĩnnya'neraavĩ dahĩlakĩma!” dada yĩ sasare dazahĩburi sarĩmĩnyĩna dĩragĩnna yawĩ'manĩge. Sare' darevĩnyĩ. Gave pwarĩna kwala maa'nya'na sarĩmĩnyĩ mena yĩhĩthahĩlakĩweihĩlyĩ. Yĩ sahwai Kĩraazĩtĩyalyĩ. Yĩ sahwaihi a'mwazĩdĩraaya tewaanya' mwaaide'bisaihĩrĩ Kĩraazĩtĩyarĩna yĩhĩmaakĩdeihĩlyĩ. ³ Kiri' nabaai nĩmĩ lika dara yĩwa. Kamaala sai kwaasiya sabwina sĩmunya naanga yawĩ'dei sĩnnawĩ kĩgaa' Yĩvavĩ kwaasi yagaala sa' wĩjaakabaaibĩ' sasare sabwi nayĩhima'nadĩka! Sarĩmĩre sĩmunyangĩ yune Kĩraazĩtĩyarĩne yawĩta dazabulyĩ yune gamĩnyĩna tewaanna yĩda'na yĩhĩvu'nya dazabulyĩ yĩhwarĩkebulyĩ. Akai, sarevĩna sarĩmĩre sĩmunya sa kayaaka nayĩhĩgalakadĩka! Nĩmĩ daza'na lika yĩvanĩge. ⁴ Sare' darevĩnyĩ. A'mwe kwai sarĩmĩnyawĩnna yĩma'naabada Jizaaza pwarĩna yĩhĩzĩwaakadei. Nemĩ yĩhĩzĩwaakoyai yĩ Jizaazai sahwarĩna mĩ'.

Yi sasare dazaburi sarimi kurya nabinanyai maa'div+saihilyi. Sinnawi sarimi maareta Kurya Tewaanya dazaina mi'. Yi sarimi yagaala tewaanya nabinanya' maa'maniga'. Sinnawi sarimi yagaala tewaanya maareta daza'na mi'. A'mwe sai sariminyi tinnnyaba sasare sabwi yadei yi sahwaru kave wi'nivanigasaihile!
⁵ Sare' darevinyi. Nimi dara yawi'manige. Mudikera sara yithadivi' nabaai, "Apozeliya nawi'nyaanga wavila'nikeine," dadivisaraavi dalaangewi aane piburina kiburina maalina wila'nata mijivanigena!
⁶ Kiri' yagaala wijavi nimi nayaa miwirinkeinyi dahamwaaihe? Baa'nana! Sare kiri' nimi simunya yawisa'na kuna manyimudaasivani'. Aawa. Sariminyina yuya simunya yawita yuya sa nemi yadaanya yuya saburana yhibwaridaakwo.

⁷ Nimi Gotiyare yagaala tewaanya' yange'na yihiziwaakeinyi. Yi sara yadi nimi savina nigwia maareinyi mi'. "Yagaala nebulya' yihiziwaakadi sariminyi munyaba makilima!" dena nigwia mamaarya dazaburi nimi sainyi walarake. Sara yene'na nimi dazabwi ye' yiwetawakyabwi dingaka?
⁸ Kiraazitiyare kusilaanya piningi sariminyi yithaaya'nevi niminyi nyigaimwagya'ne nigwia maareinyi. Yi sasare saburi sahwaravire gilyivisa nimi yaaswa' mwagi'nyabisasi. Kumire widaayavina mi'. Sariminyine'nanyi.
⁹ Sinnawi nimi sarimiji yihye'mwannemwaalena yi nimi gilyivisanna nyigainakegaa' yi dazagaa' sarimijiya a'mwe aane pwarina kwarina taanga wijaaveinyi mi'. Sare' darevinyi.

Neya'mwerana Maazathoniyadaa'nyara anga Koridina yi'maveva gi'lyivita nyigainadaasiya sahwara yunebanna ye'. Yi gi'lyivita yuya nim+ nayaa yavada'gainadi sariminyina nim+ taanga pimili' kimili' mayihizaaye. Nabaai divi yuyagaa' yi nim+ nayaa kuna sara yideinyi.

¹⁰ Yagaala nebulya'nanya Kiraazitiyare' sa' niminyi sahwainyi nyari'. Sarevidaa'nyi yuya Piroviji Giriza simagi niminne yaya' munyaba makidi yadinya dazabwina a'mwe aane pwai nimire tusa' yaya' makilya'ne' kaanya yiniga wi'na tihiradei mi'. ¹¹ Nim+ sasare sa' baari'na yivanigena? Nim+ sariminyina tewaanya manyivu'nyivanikeinyi dingaka! Aawa. Gotiyai mena nyawi'mani'. Nim+ sariminyi nyivu'nadeinyi. ¹² Sare kiri' "Pwara kum+ne yaya' munyaba makilya'ne tusa'na 'Polimiva avaa'na yadiv+tabaaibi' sabwina biraana!' dadivi' yaamiji yina yadaapi 'Tuta sa' kaanya tihiri'ma!' dena sarimire nigwia maa'dinyainyi mi'. Yi nabaai nim+ yune sasara yideinyi."

¹³ Sare' darevinyi. A'mwe dazara kwaasiya apozeliyare. Sahwara kwaasi yadiv+isare. Sahwara kum+rebwi marovinya yadivi' yune kilaakejikina "Kiraazitiyare Apozeliyainera," dahilakimaniga'. ¹⁴ Yi dazavine'na sarimi atika mamaru'napina! Sare' dare'nesi. Saataan+ gami sai gannya kwaasiyabwi marovinada yune kilaakejikinanya' sai baakev+ya ejeliyaibi' yima'nadelyi. ¹⁵ Sasare savidaa'nyi gamire widaayadivita a'mwera kwaraji kum+rebwi kwaasi marovinya yadivi' a'mwe yida'maraangebwi yadiv+isarabisara

kwaasi yima'nadivisa' naange' daaka! Yi a'mwe sahvara dividaa'nyi kumire kwaasi yadivita sabwina tivikita kayaa'nanya maapi'dere. Kumire aayagaa'ne' kayaa'nanya sahir'i' wari'.

¹⁶ Sinnawi mena yihithiwe' nimi ayahi yihithima! A'mwe pwai kwai niminyina dara nyawiradi' "Sai a'mwe simumaayalyi." Kiri' sare' yawirya'neihiri' yihvu'naja' "Nimi kwainyiji' simumaayaibisainyi' niminne yaya' munyaba makilima!" kada'muji' kave dinyu'naabyila!

¹⁷ Nimi Naangei yakebwi mamidinnyadi yagaala dara majivanige. Aawa. Simumaayaibi' yagaalya' yaya' munyaba makilya'na nimi diraginna yivanige' dara dahathivanige.

¹⁸ A'mwe kwalaalyara kilakejikiyabwi mididivi' yi kuminne yune yaya sangina munyaba makimanigasavi' yi dahaa' nimi kwainyiji' yaya' munyaba maalina makilideinyi.

¹⁹ Sare' dare'nesi. Sarimi a'mwe simumaayaraavi' kwaasi yagaala yihiziwaakadivisaraavi' yilaaya'na kave wi'nivaniga'.

Sarevi' simunya tewaanya' kininnakeihi daa! ²⁰ Sare' darevinyi. A'mwe pwai kwai gamire yaasiwa'wawinya'na yihimwagi'namakabaza' yi sai sarimire gilyivita yuya yunebanna yaja' yi sai gamire kwaasiya'na yihigalaja' yi sai kayaa'na yihibwaakaja' yi sai sarimire sidalengi' mala yihiramaja' yi sara yihyadaawori sare sarikave nayaa wi'nivanigasaihile!

²¹ We! Sasare kayaa'nanya sabwi ya'ne sahvara yadivisanna nemi diraginya maayaine. Sarevi' yi nimi savina jalikurakiwe' yi nimi wagiya'

nyivwa'nanneinye!

Nabaai a'mwe pwai kwai diraginna yada gannya sabwina jalikurakadevurina yi dazahiburina nimi kwainyiji diraginya yadi jalikurakideinyi. Sara diwe' a'mwe simumaayainyibi' diwebaaibisasi. ²² Sahwara Yiviruyara dingaka? Yi nimi kwainyijinyi. Ne Jaikopimdaa'nyara Yizireliyara dingaka? Yi nimi kwainyiji. Ne Eviraamimire yisiwira dingaka? Yi nimi kwainyiji.

²³ Kiraazitiyari widaayadivitara dingaka? A'mwe wana sidu'maaya yune navi'navika nebulya'nanyaibisainyi dara dima! Yi nimi wavila'dinyainyi. Yagiyagi wawinya kwalaalya naangengina wavila'na. Nimire wawinya'na kalavuzi kwalaalya naangengi yirakesangina wavila'na. A'mwera niminyi mala naange nyiradaapiri yi dazavi sahwaravi nebulya'na wavila'na. Kwalaalyagaa' nebawa kabaimudikeinye! ²⁴ Yi yirika dahasaai dahasaai dahaa' sarevi Juyara wila kayaa'nanyabaalyi nyili'bware'. Kuna nyili'bwa'divi' aaya' teti naainiyavi (39) tamidaakuna nyadiviki. Sarevi aya kiba nimi baligirasainyi. ²⁵ Yirika dahasaai dahaa' Romiyara yisarikaji nyirame'. Gave pigaa' a'mwe pwara siliyaji liwakina nye'. Gotiyare wawinya'na wodi yirika dahasaai dahaa' sipiya' kayaaka yinyina kya' nimi saalaalyavi yiwina kyiwidikeinyi. Yi sarevidaa'nyi pigaa' sawita piri' yirite piri' saalaalya naangevi a'ba yilaramaryeinyi. ²⁶ Nimire widaayaburi kwalaalyagaa' nimi tuta saaminyavi waweinyi. Aalya yarai

bwalyawodaa'nyi yiwina kiwidikeyi sara yeinyi. Yi a'mwe kuka yipalamaa'divisaraavire asiri saba sana yiwina kiwidikeyi. Yi nimire yisavaakiyara Kiraazitiyarina sinna tika wida'daa'nyi niminyina “Kayaaka yigalaana!” deva sara kanyiramakipidikeinyi. Yi a'mwe ajimya piningiya pwara sara kwaraji “Kayaaka yigalaana!” deva sara kanyiramakipidikeinyi. Yi anga naangeba sara yiwina kiwidikeyi. Yi kwaaka a'mwamaayavi sara yiwina kiwidikeyi. Yi saalaayavi sara yiwina kiwidikeyi. Yi a'mwe “Nemi Kiraazitiyareinera. Ja'mweinera,” kwaasi dadivisaraavire asiri sara yiwina kiwidikeyi.

²⁷ Nimi wawinya kwalaalya yagiyagi sara yeinyi. Diraginna miraaigikireinyi. Kwalaalyagaa' sawi'wawinya yadi se wareinyi mi!. Miji'na mwaalina yadi aalya'na baleinyi. Kwalaalyagaa' Kiraazitiyare wawinya'na tika wapaaya yagalya'maveinyi. Niminyi yirila nyadaa'nyi baazi'ma'nyanna kune nyima'nakeinyi.

²⁸ Nabaai yune sahininanna mi!. Pini warike wavila'nikeinyina wibwaridaakuvanikengi. Yuya yirikerikaavi nimi Kiraazitiyare kusilaanya yuya sangi maremwaalya'na simunya kwalaalya yawi'dinyainyi. Yi daza' taanginya naanga nebulya'nanya' nyakivani!. ²⁹ Yi a'mwei Kiraazitiyari limwadei gamire kuryai diraginya maayai yojiya'na yi nimi kwainyi gamibi'na najinanyainyi ye'mwannamwaalideinyi midaaka! Yi a'mwe kayaa'nanyavi yidihwaki'naraawajai yi daza'na nimire simunyavi kale dusina, daanga naanga

dike'bi' nyiginyiwannaradeinyi midaaka!

³⁰ Nabaai nimi yevina “Kwalaalyanna diji,” yawi'mujainyi yi nimiti dara dideinyi. Nimiti diraginya maayainyira. Yi dazavina nimitinne yaya' munyaba nayaa makilideinyi.

³¹ Gotiyai, Naanga Jizaazariti Ganimaangei sahwai nimitinyina dara yawi'delyi “Sai kwaasi majiwa!” Nemitu yuyagaa'na sahwarine yaya' munyaba makidaanyai sara yawi'delyi. ³² Yi sarimiti nayaa yawiranganya'neihiri “Politi diraginya maayalyi,” yihithima! Damaazikazi saba Aaretazai Kingiyai mwaala'. Sarei kiyapiya naangeri anga naanga Damaazikazi tikuryavi maremwaalya'neri dahilakakelyi. Yi sahwai dame daaya'nei nimitinyina “Kalavuzayirima!” daka nyakelyi. ³³ Sara kanya' nya'mwe pwara soigilya naangevili ka wilanyimarulakeva angebanya sikurikevi munyaba dabu'nikevi nimitinyi wilyabaari makwasaabina nye'. Yithaa, sara kanye' nimiti walaabina yina yena likaanya wina ye. Sarevidaa'nyi yi nimiti kiyapiyare asiriti makwasakena yi nimiti likaanya wina ye. Saza yadinyainyi wirisainyi.

12

¹ Tusariti piriti miti. Nimiti yune nimitinne yaya' munyaba makimujainyi. “Nebulyasi, sasare dazabwi negaimwagathe' miti,” yawi'daanyai. Sarevi kiriti a'mabaaitinna pininnajiti lika yulyakya pinijiti Naangei marima'naabadennajiti dide'nanyiti. ² Kiraazitiyari wilamwaalika pwari nimiti mena yawirangadinyainyi. Yi sahwari kwarama potinyi (14) kigaa' Gotiyai

gamireba Sigunyavi menya ke'mwewinna yarai yipalamakilaawa'. Ai, sai kilaa'nakei dahamwaala'? Nimi myawiriwa. Sai kilaa'keji' yagalya'mata dahaya'? Nimi myawiriwa. Gotiyai yune gave sahwaina yawi'dei. ³ Yi nimi a'mwe dazarina yawirangadinyainyi sahwari Gotiyai nawinyabanna Parathaazi wo'nikebanna makilaawakerina. Sai kilaa'nakei dahamwaala'? Sai kilaa'keji' yagalya'mata dahaya'? Nimi myawiriwa. Gotiyai yawi'dei. ⁴ Sigunyaba sai kadika wi'naka yagaala sangi a'mwei yiniga wi'na dannei mi'. Yi Gotiyai daza kirinaji kimaakiya dakina. ⁵ Sasareriyima'nakevina nimi gaminne yaya' munya ke'ba makilya'neinyi. Nimi'nyine'na nimirne yaya' munyaba mamakimuna! Kiri' nimirnyina gave piri'na dara dide'na "Nimi diraginya maayainyira," nimirne yaya' yiniga wi'na makilideinyi. ⁶ Sara yiwineinyi. Sare' darevinyi. "Nimirne yaya' makilima!" diwija' a'mwe navi'navikeinyibi' yideinyi mi'. Sare' darevinyi. Yi nimi yagaala nebulya'na diwineinyi. Kiri' yune nimirne yaya'na mamakilyivanige. A'mwe pwai nimirnyina dara nyawiradika! "Poli a'mwe wana nawinyaangelyira." Nimi yivanige sabwi sahwai tinna wangananneji' nimi yagaala divanigengi kadika wi'nanneji' sasare sahinngi simunya nayaa yida'na yawirade'na tewaanyasi. Nebulya' dingaka? Kwaasiya' dingakaji? ⁷ Yi yuya daza Gotiyai nyibwaridaakwake wana naanga nebulya'nanyanna "Yi gaminne yaya' gami saina naanna namakiladika!" daka sarevidaa'nyi Gotiyai lange'bisa' daange' nimir

kilaakejiki nyimulya'ne' nyijaava'. Yi daza' "Saataanimire ejeliyai Polim+ mala wiramana!" daka nyijaava'. Nimi+ yune niminyine'na naanna namakimud+de'na niminyi marulawakya nya'nei daanga nyiv+delyi. ⁸ Dazav+na "Naangei niminyi marasi'nana!" dena yirika dahasaai dahaa' diraginna yidaangane'nanyi. "Tewaanya mwaalima!" dena yidaangane. ⁹ Kir+ nabaai sahwai dara nyida' "Nimire yanga gaimwanga naangebwi giminyi yiniga wi'nannebulyi. Darevinyi. Nimire diraginya' a'mwe diraginya maayaraavi wawinya yuna nebwina wiadesi." Sarev+daa'nyi "Taanga nanyadika!" madiwina! Nimi diraginya maayainyire wirita savine yaya' munyaba makid+nyainyi. "Kiraa+z+tiyare diraginya' yune niminyi nyarana!" dad+ sara yide'nanyi. ¹⁰ Sarev+daa'nyi Kiraa+z+tiyar+ine'na wirisangiji biraiyagaalyangiji ny+gainyangiji kayaaka ny+gaidengiji taanga dala p+n+na pininnanyangiji nimi wikira. Sare' dare'nesi. Nimi diraginya maayainyi mwaala'muj+yagaa' yi dazagaa' sagaa'na diraginya nebulya'nanya' kininnakeinyi.

¹¹ Nimi nav+nav+keinyi yima'n+wa. Kir+ nabaai nimi yad+nyabwi nayaa myaw+rangany+waasavi sar+mi kyanyid+ika'mwa'daa' yi nimi sara yima'na yagaala sa diwa. Sare' darevinyi. Sar+mi nim+nne yaya' munyaba makib+za' sa' yida'nanyabulyi. Kir+ sar+mi sasara yad+vitaihi mi'. Sare' darevinyi. Nimi geinyira. Kir+ mud+keru "Apozeliya naw+nyaanga wav+la'n+ikeine," dad+vi+ta

dazaraavi dalaangewi nimi mula'narige. Aane piri' kiri' manyimudaasadeinyi. ¹² Nimiरे simunya' diraginya yuya yivaimwannadi sariminyaba Gotiyare wawinya' yadi apozeliya kware wijiwaainya nebulya nimi marima'naabe. Sa yi darengi. Yijiwaainya dala pininna pininnanyaji atika maru'nasaji diraginya yaji sa yima'nikengi. ¹³ Sare' dare'nesi. Nimi yihye'na “Kiraazitiyare kusilaanya piningi naanga ya'. Neminyi maalika ya'.” Sara yawi'manigasaihi daaka! Nimi yadinya'na sariminyine pininna yihimudaasade dingaka! Yi yihimudaasade' gave piri'nanya' daresi. Nimi sainyi gaveinyi sariminyi taanga yihizaaveinyi mi'. Sarimire gilyivisa yihimwagi'neinyi mi'. Nimiरे yiwetawakya dazawaai sarimi nayaa dimarasi'nyideihile!

¹⁴ Yithaanyi, dahaa' sariminyawinna dahasaai dariki bide'na nimi yemwaala yiwa. Yi nabaai taanga mihizaayadi sarimire gilyivisa yihimwagi'nideinyi mi'. Sare' dare'nesi. Sarimire gilyivisa maarya'na nimi mabiramaariwa. Aawa. Nimi sarimi sahwhihiri maarya'na nyivu'nivani'. Sare' darevinyi. Kaimiraayara sahwarakuvinimaangeyuraavi gaimwagya'neyuraavi gilyivisa mari'bwarakya'nera wawinya maayarera. Aawa. Yune kuvinimaangeyura kaimiraayaraavi gaimwagya'neyura mari'bwarakya wawinya sa' kininnakeyurera. Nimi sirinimaangeibisainyi sara yihithiwa. ¹⁵ Yi yihigaimwagya'neinyi nimiरे gilyivita yuya wasisa'na, nimiरे gaala kibulyi wasisa'na.

Yi sarevina nimi “Wikira,” dadinyainyi. Nimi sariminyina tewaanya naanga naanga nyivu'naja sarevidaa'nyi sahiriv+ tivikita ya'ne' niminyina sarimire yih+vu'nyabwi yune maal'nanya' jivanika! ¹⁶ Kir+' nabaai pwara sahvara niminyina dara divaniga' “Nebulyasi. Sai sarimire gilyivisa ku'maayaba maarakei m+'. Aawa. Sai a'mwe nyil+nyilika dadelyi. Yi kwaasiyabur+ sai sarimire sinnyikaavi lika yulya'mwagakya yada sariminyi yih+mwagi'namaara'.” ¹⁷ Mena maryasaabera a'mwe pwara sariminyawinna besaraavidaa'nyi kwaraavire asiri nimi kwaasi yena sarimire gilyivisa dahayih+mwagi'ne! ¹⁸ Nimi Taaitazari kyadikaave yi sahwai sariminyawinna bakei, yi nimi neya'mwe pwai dazai maryasaabei salyi ye'mwannigwawa'. Taaitazai sai kwaasi yaka sarimirena mwagi'nakei daaka! Gamiji sainaai simunya gave avainanyavi kaanya yamaryolyainaai midaaka! Tuta yune gave piriv+na yibwaramakwadasainaai midaaka!

*Koridi mwaalyara yavada'gainya'neraavi
“Mala nayaa jiwannyila!” widake'nesi.*

¹⁹ Yagaala yuya dazangi sarimi danganapiji yi neminyina jawiryideihi dingaka? “Nemire tinnyari Polimivaavi marida'maya'ne' yida'mwakelyi.” Kir+' aawa. Gotiyare tinnyari nemi Kirazitiyari wlamwaaihoina yagaala daza divanigo. Kir+', sariminyina tewaanya nyivu'nadeihi, nemi yivanigo yuya sa, yi sariminyinenna diraginya yivaimwanga yihyadennanyi. ²⁰ Sare' darevinyi. Yi

nimi lika dara yivanige nayihwangamudika! Sariminyawinna bi'mava'muji "O, sah-waraavina simunya nayaa yawirima!" diwija' kiri' sarimi nayaa mamwaalyi yadivi' sareihiri nayihwangamudika! Nabaai sarimi kwaihi "Poli neminyina yilaaya yana!" yawipija' kiri' nimi sainyi maanga yihiza'neinyi sareinyi nanyangabithika! Akai, sariminyaba kayaa'nanya dala pininna pininnanya dare naradika! Maanga dinyina, tiganaarya yawina, sinna tika davina, pimaginiyavakaavi maiyagaala dina, kayaakyagaala dina, bulayagaala dina, pihadika yibwaakina, gavamarasi'nyiyagaala dadivi' yina. Nimi dazanna yipija'na lika yivanige. ²¹ Akai, sariminyawinna ayahi kaba'muji yi sariminyina nimire Gotiyai niminyi nanyimarulawakadika! Yi a'mwe kwalaalyaraavi yavada'gaidi sahwaravina kinna nadiwidika! Sahwara sinnawi kayaa'nanyabwi yesara simunya mudikebwi myawiramaariwaa'. Yi sahwara kayaa'nanya girikita'nanyabwi yina, ata limwangebwi yina, dika widadaasi yina, yi sara yadivisaraavina kinna nadiwidika!

13

¹ Dahaa' sariminyawinna nimi bide dahasaai dahaakira. Mi'na bi'mava'muji yavada'galya'na dinike'na dara yideinyi. A'mwe pwaraai a'mwe kwaraai kwai avaaimaangi'na kajal'kurakapiji yagaala daza' diraginya wa'da yagaainakeraavi yawibwarideinyi.
² Sinnawi sagaa' yiwetawakya yesaraaviji

sariminyi a'mwe yuya pwara kwara sara yiwa'daasaraaviji yi pigasaalyagaa' sagaa' nimi sarimiji yihye'mwannamwaalena "Sarimire yiwetawakyangine tivikisa'na mala nayaa jiwannyila!" yihithevaai' yibwa'naweinyi ya'ne sabwina ayahi dara yihithivanige. Sariminyawinna ayahi ba'muri yiwetawakya yadivisaraavi yaas'wa' wanganakina yideinyi mi'. ³ Sare' dathare'nanyi. Sarimi "Naanga nebulya'na yawiranganaaji 'Kiraazitiyai Polimire maangevi dathei dingakaji,' " jawiranganyide. Kiraazitiyare diraginyavi yihyideinyi. Sahwai sariminyina wirisa'na yadei mi'. Aawa. Sahwai sariminyina diraginaangelyi. ⁴ Sare' darevinyi. Kigaa' sahwai wirita kininnakeri pwara yisaviri niliya wiramesalyi. Kiri' nabaai Gotiyari diraginya kininnakei gaalyai mwaali'. Sare' datharevinyi. Nemi sahwari wilamwaaiahovi nemire kilaakejikaavi kwainaji diraginya maayaine. Aawa. Kiri' Gotiyare diraginyavi nemi sahwalyi gaala gamireina ye'mwannamwalaadeine. Yi nabaai nemi sariminyi yihyavada'galya'neina diraginya daza' marima'nabaatheine. ⁵ Sarimi nayaa jawiryide'na "Nemi Kiraazitiyari limwaga'manigoina daaka?" sarinnya simunyangi yaamiji jila! Sarimi saihi sahwaihiri nayaa jawiranganyila! "Neminyi Jizaazai Kiraazitiyai sahwai wlanemwaali'," myawirivanigasaihi daa! Nabaai aawana. Yi savina sarimi kwaasiyahiri jawirangannyideihi dingaka? ⁶ Yi nimiru yawita yivanige. Sarimi neminyina dineyawiranganyide

yawibwata dazavi yinigeva. Kwaasiyaina mi'. ⁷ Yi nemi Gotiyari yidangadaanyi. Yi sarimi kayaa'nanya aane pi'bwii kibwi mi jideihilyi. "Nemi yavada'galya'neina yiniga mi'nanyaina ku'maayaba nayaa yima'nabaana!" dona sara yidangadaanyaina mi'. Aawa. "Yi sarimi tewaanyabwi jila!" dona yidangadaanyi. Sare' nevu'nivani'. Nemi yiniga wi'nanyaina ku'maayaba yima'nabaadeinaavi myawiranganya'ne'na wikira. Sariminyawinna bawaaji Kiraazitiyare diraginyasi yihyavada'galaade' wikira. ⁸ Sare' darevinyi. Nebulya' marulawakya'neina yiniga wi'na yaanneina mi'. Aawa. Nebulya' gaimwagya'neina yiniga wi'na yaanneinera. ⁹ Nabaai sare' darevinyi. Nemi wiriti kininnakeibisaina mwalaaja gazagaasagaa' nabaai sarimi diraginya' kininnakeihi mwaaibizagaa' nemi yilaaya yina yadaanyainera. Nabaai sarimi yavada'gainya'neihi tewaanya yida'maraanga naw'nyaihi yima'nya'na yuyagaa' nemi Gotiyari widadaanyi. ¹⁰ Savidaa'nyi "Nimi yibwa'naweinyi sarimiji bihye'mwannamwaala'muji Naangere diraginyasi yarai davanganasa'na mihizi yima!" dena pikarya datha' yida'mwa. Diraginya daza' Naangei nyijaavake', yi daza' diraginna limwangeburi diraginya yiwagya'nesi. Sa' yawisangi kayaaka wo'dalasi'nya'ne' mi'.

Yagaala pimaginya pininnesi.

11 Nya'mweihi, dahaa' yagaala aaya' di'ma! Tewaanya di'mwaalyi! Tewaanya yi'da'maraanga naw+'nyaihi yi'ma'nya'neihi yavada'gainyina jila! Nimi're yagaalya' nayaa wi'namidinapiji sarinnya simunyangi diraginya yivaimwannynina jila! Simunya avaananya' jaw+ramaarila! Kwaamu'nanyaburi di'mwaalyi! Sara yadivi' yi Gotiyai tewaanya wivu'nyaburi aaya kaavilyai, kwaamu'nanyaburi aaya kaavilyai, yi sai sarimiji yihye'mwannamwaaladelyi.

12 Sariminyi gazaizai gya'mwe pwar "Nya'mwei!" dada maangwidaayilaaya tewaanya' yana!

13 Dava Gotiyare tewaanya yuyara sariminyi "Neyamweihi!" yihthivaniga'.

14 Naanga Jizaazai Kiraazitiyai sarimi yuyaihiri yanga gaimwange' kuna yihwakana! Gotiyari sarimi yuyaihirina tewaanya kuna wivu'nana! Kurya Tewaanyai sarimi yuyaihiyi kuna yihye'mwannamwaalana!

Poli

**Yipma Genesis and New Testament
Genesis and The New Testament in the Yipma/Baruya
language
Buk Stat na Nupela Testamen long tokples Yipma long
Niugini**

copyright © 1993, 1994 Wycliffe Bible Translators, Inc.

Language: Yipma (Baruya)

Translation by: Wycliffe Bible Translators

Video recording © The Jesus Film, a project of Cru.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-02-07

PDF generated using Haiola and XeLaTeX on 3 Mar 2023 from source files dated 9 Oct 2020

ef60f748-49e3-5ee0-8e6d-a25b74b7a93c